

四庫全書

史部

欽定四庫全書

浙江通志卷一百五十七

名宦

十二

處州府

晉

孔松陽

嘉靖浙江通志史失其名為松陽令後人繪像祠之孫綽作孔松陽贊序云君德器純固

氣宇高邃荆玉不足論其溫南金未能方其厲夫其溫恭篤誠善誘勤勸外身崇物菲躬厚人指撝必謙動靜克讓允有古賢之流風乃祖之遺文矣贊曰於穆我侯舍和體仁行範乃祖德冠縉紳降

跡垂化澤侔三春超
然遐舉遺愛在民

南北朝

江子一

南史本傳字元亮濟陽考城人晉散騎常侍
統之七世孫少慷慨有大志家貧以孝聞仕

梁起家王國侍郎奉朝請啟求觀書秘閣武帝許
之有敕直華林省為遼昌令著美績後為南津校
尉侯景攻陷應陽子一赴建
業及弟子四子五並力戰死

韋沖

冊府元龜沖簡校祐州事東陽賊帥陶子定吳
州賊帥羅方惠並聚眾為亂攻圍婺州永康烏

程諸縣沖率
兵擊破之

唐

李邕

唐書本傳字泰和揚州江都人玄宗即位為戶部郎中左遷梧州司馬徙澧州開元二十三年

為梧州刺史喜興利除害坐誣枉且得罪天子識其名詔勿劾後歷淄滑二州刺史北海太守時稱

李北海

李陽冰

畿輔通志字少溫趙郡人以詞翰名乾元間為縉雲令修孔子廟自為文記之歲旱禱城

隍與神約不雨焚其廟及期雨霑足亦自為記秩滿退居吏隱山後遷當塗令篆書尤善

李繇

嘉靖浙江通志建中間為縉雲令有政聲邑有孝婦陶氏喪姑負土成墳一哭而絕繇為立碣

請陸羽撰文以表之

齊抗

權德輿齊抗神道碑字遐舉高陽人累遷諫議大夫當軸者不能容坐細故出為處州刺史先

是山越寇攘蕩覆城市抗乃卜勝勢之與塏目習俗之便安三時不害百堵皆作後拜中書侍郎同中書門下平章事贈戶部尚書

李繁

嘉靖浙江通志京兆人泌子元和十二年為處州刺史至郡即建置廟學於擇山之巔立願子

以下十八像其餘六十子及公羊高左丘明等數十人皆繪之壁選擇博士弟子員為置講堂俾之行禮肄習其中廩餼供億雖小亦備處之人士皆知興學實自繁始韓愈為孔子廟記謂其為政知所先後云

邢羣

嘉靖浙江通志字渙思會昌五年自戶部員外郎刺處州在任刑清事簡束縛黠吏撫輯良民

冗事弊政必盡拔其根株而後已去任之日老穉泣送於途

李中敏

嘉靖浙江通志字藏之為人性剛峭有氣節會大旱上言乞斬鄭注則天且雨不報遂以

病告歸潁陽注既誅召為諫議大夫給事中會昌六年刺處州政平訟理

段成式

與地廣記字柯古臨淄人枯州縉雲山有好溪本名惡溪多水怪大中中刺史段成式有

善政怪族自去
因改曰好溪

宋

楊億

宋史本傳字大年建州浦城人雍熙初授秘書省正字淳化中賜進士第遷光祿寺丞真宗即

位拜左正言知處州郡人周啟明篤學有文深加禮待召還拜左司諫知制誥為翰林學士兼史館修撰舊浙江通志億知處州以寬大為政歲稔刑清

甄旦

明一統志至道初知麗水縣吏道詳敏而飾以文學清白以率下明察以照奸到任未期政治

大成

房從善

括蒼彙紀清河人雍熙初為遂昌主簿建文廟設聖像興教化正風俗通判梁鼎嘉其能

立石記之

仲簡

嘉靖浙江通志字畏之江都人歷知處州稱治為浙東第一後知廣州徙洪州

宗大年

明一統志慶厯中知青田縣民貧無以納稅州符追連縣吏大年悉令候冬熟納足民感

其惠

何辟非

括蒼彙紀建安人皇祐中宰遂昌興學立教得為政大體初邑未有學而夫子廟在西郭

至是乃於邑之東南隅初立殿堂齋序
後令施肅李喬李宗孟王淵相繼成之

傅楫

宋史本傳字元通仙遊人第進士知龍泉縣孫
覺為御史中丞語之曰朝廷欲用君盍少留楫

曰仕官所樂居中者免外臺督責耳令俯首權門
與外臺奚擇且外官已所當得也遂去不顧枯蒼

棠紀楫在任發摘
隱伏奸猾屏跡

張仲倩

明一統志神宗時縉雲尉治有政聲縣有淫
祠曰五通歲旱仲倩遍祈不及五通吏民以

請仲倩往命毀
之歲亦大熟

劉琦

明一統志宣城人熙寧初為侍御史疏論王
安石言行乖戾坐貶監處州酒稅以直聲聞

李長卿

括蒼彙紀開封人元豐初知
縉雲政治嚴簡百里安之

黃發

崇禎處州府志泉州人元豐初知龍泉縣修宗學校進諸生講論經學自是邑多聞人

劉彝

宋史本傳字執中福建人從胡瑗學瑗稱其善治水凡所立綱紀規式彝力居多第進士為兩

浙轉運判官知處州俗尚巫鬼不事醫藥彝著正俗方以訓斥淫巫三千七百家使以醫易業俗遂

變加直史館知桂州坐貶元祐初復以都水丞召還

邱括

崇禎處州府志荊州人元祐初知龍泉縣距郡溪行三百里多灘磧中為最險括與簿馬應共

議疏鑿至今賴焉秩滿吏民爭挽留之夜潛遁去

劉芹

明一統志海州人元祐中知青田縣時邑未知學芹躬為訓誘風俗一變競以儒業相高

徐公武

崇禎處州府志潤州人元祐末知青田州舊貢黃連征屬邑邑非所產民以為病公武力

言於州而罷之
後仕至鴻臚卿

黃葆光

宋史本傳字元暉徽州黟人賜進士出身擢左司諫蔡京權勢震赫葆光攻之京中以他

事貶知立山縣京致仕召為職方員外郎改知處州州當方臘殘亂之後盡心牧養民列上其狀加

直祕閣再任卒
州人立祠祀之

張根

宋史本傳字知常饒州德興人甫冠第進士調臨江司理參軍遂昌令括蒼崇紀根下馬積案

數十不聞旬而決曲直情偽無不曲中由是猾吏革心獄訟衰息既又築二堤創三橋立四門興利

除害治
績顯著

陳戩

括蒼崇紀徽宗時教授本州後以朝奉大夫充實文閣待制知本郡時久旱戩下車雨霑足人

以為隨
車雨云

王昶

枯蒼彙紀揚州人政和初知麗水賦役均平吏無容奸縱囚使歸尅期而至邑有通濟堰灌田

數千頃久而沙石積塞渠壅不通民甚苦之昶作石函度沙石修斗門泄暴漲無堙塞患民為立祠

配詹南二司馬歲時祀之紹興中復以朝散大夫知處州

黃烈

嘉靖浙江通志字元功浦城人宣和間守處州時清溪盜發麗水青田松陽遂昌皆沒於賊而

劍川獨完烈奉詔即劍川治事能奮勇宣力區畫得宜賊將洪載以城降仍與通守會稽石端中謀

築郡城民賴以全

張翬

宋史本傳字柔直福州人舉進士守南劍州遷福建路轉運判官未行會范汝為陷建州遣葉

徹擁衆寇南劍甯州兵與之戰徹中流矢死衆
敗走城賴以全以直龍圖閣知處州蕩平餘寇進
修撰

江安止

明一統志字元靜建寧人靖康間知麗水縣
為政明敏囹圄屢空案牘無積又練鄉兵以

禦寇邑
賴以寧

許尹

嘉靖浙江通志樂平人政和進士歷知處州有
善政高宗時攝蜀帥甚得人心遷司農卿孝宗
即位上疏乞延儒臣講求治

道尋以數文閣待制致仕

胡涓

括蒼彙紀字霖卿鄱陽人靖康中應神童科後
登進士第丞遂昌縣治距溪不數步而儒學切

近於其側每霖雨溪流漲溢則堤湍鬻害巨涓涓
因仿舊龍圖張根所築堤址而修甃之身自董役

堤成百姓

蒙其利

董伋

括蒼彙紀饒陽人建炎中知遂昌邑民夏賦輸網舊用絹絲伋不忍重困民曰是給諸卒雖麻

何傷諭輸網者悉以麻郡從例責吏亟易伋即詣郡白其故郡不能強後守至諸邑宰畢參率獻無名金伋稟命而旋力陳已之其以身庇民如此

汪汝則

括蒼彙紀宛陵人紹興初知龍泉縣適劇寇楊就焚蕩之後閭盜范汝為復擁衆出沒縣

界時樂孤輩詭謀鼓譟欲從之且肆掠於市民不寧居汝則至恬若無聞視事三日捕首姦二人尸諸市其徒股栗莫敢動事平以擅殺告待罪郡守蘇達曰當多難之時為百姓除害何必爾也請於朝以留之因疏名於屏任滿陞紹興府判

艾若諾

崇禎處州府志紹興初青田令留心撫字嚴於馭吏尤惡鄉胥之舞文嘗大書座屏曰愛

民如惜血捷吏勝看經棒
折鄉胥手何勞誦大乘

游九功

嘉靖浙江通志建陽人紹興中知慶元有古循吏風

葉綰

嘉靖浙江通志閩人紹興十七年知龍泉令行禁止訟牒至庭灼見誠偽民所爭辨必曉之理

委曲開諭其抵罪者咸自輸服習俗好爭綰教以懲忿息怒率多感化先是邑佐括民老病以為隱丁抑之輸納綰驗而免之

鄭必明

崇禎處州府志字南仲閩人紹興中宰遂昌以儒雅飭吏事好賢下士以名教為先修學

宮謹課試
風動四境

范成大

宋史本傳字致能吳郡人紹興二十四年擢進士第隆興元年遷正字累遷著作佐郎除

吏部郎官罷奉祠起知處州處民以爭役囂訟成大為勅義役隨家貧富輸金買田助當役者甲乙輪第至二十年民便之其後入奏言及此詔頒其法於諸路處多山田梁天監中詹南二司馬作通濟堰在松陽遂昌之間激溪水四十里溉田二十萬畝堰歲久壞成大訪故迹疊石築防置堤關四十九所立水則上中下溉灌有序民食其利除資政殿大學士充金祈請國信使全節而歸改敷文閣待制四川制置使召對拜叅知政事奉祠起知明州奏罷海物之獻除端明殿學士進資政殿學士再領洞霄

宮加大學士

李大正

崇禎處州府志字正之建安人乾道中始為遂昌尉去為會稽令念遂民不忘求知邑事

既至得滯案數十判決如流無不快人心先是丁役不均科折違法丁產與稅乘除不以時大正盡革其弊凡學之宮室器用廢壞者皆新之

陳戒

崇禎處州府志乾道時松陽令律已清廉勸民義役以息爭訟卒於官編素祖奠者數百人

林采

括蒼梁紀字伯玉閩人淳熙中知遂昌始至一新學舍請還贍學金於郡括匿稅田於鄉以廩

士旬有課季有考學者翕然向風核隱戶定稅名置都籍事無不舉

傅兆

崇禎處州府志上饒人慶元初知龍泉為民備荒出所得俸錢六十萬有奇會歲豐穀賤盡以

博糴為米三百餘斛置倉別儲俟農事方殷舊穀將沒則如其價以出之至秋復斂名其倉曰勸儲擇邑有行誼者司之歲率為常民懷其惠

富嘉謀

崇禎處州府志慶元初以松源鄉立慶元縣嘉謀莅任始闢街衢營公署立學校建壇壝

不期年而就民無勞擾

朱元成

崇禎遂昌縣志字少翁平江人慶元中知遂昌練達吏治縣之役錢累至積壓預借及三

料計一萬三千五百緡乃根括舊逋撙節浮費補填其數迄今邑無預借之擾創常平倉儲粟米以備凶荒皆利民經久之計

司馬掀

括蒼彙紀字仲舉嘉定初自左藏出宰遂昌撫字教化上格於天是年有嘉蓮一柄雙花

粟一本發十八莖莖生八九穗觀者如堵民為立堂扁曰嘉瑞

楊大異

明一統志醴陵人嘉定進士調龍泉尉攝縣事適歲飢提刑司遣吏和糴米一萬石於邑

米價頓增民乏食大異即以提
刑所糴者如價發難民甚德之

陳達

崇禎處州府志三山人嘉定間知遂昌首謁學
宮引試士子一時士風丕變囹圄空虛既去民

繪像立
祠祀之

王圭

崇禎處州府志吳郡人先為麗水簿秩滿攝松
陽民安之請郡上其事詔即真焉正疆界定版

籍惠政在
民實多

葉武子

括蒼彙紀紹定初守括時民生凋敝兩稅外
尚有浮財物力之徵民不勝困武子慨然身

任其責即疏其弊懇乞除豁可
其奏民賴以甦立碑於麗陽廟

劉歲

明一統志莆田人淳祐中由進士知青田縣明
於政事洞見源委吏無所欺以崇學校厚風俗

為先民懷其惠

肖像祀於義倉

李雷奮

明一統志鄱陽人咸淳中知處州在郡廉謹嘗捐俸造郡學士民立祠於學祀之

元

趙賁亨

元史本傳字文甫冠縣人襲行軍千戶至元十四年授虎符懷遠大將軍處州路總管府達魯噶齊未行適盜發澈浦行省檄為招討使率兵平之未幾處州青田縣李文龍章焱殺趙知府以叛賁亨獲其黨始知七縣俱反又龍自署為兩浙安撫使據處州天慶觀賁亨率眾圍之將騎士三百陳於下河門賊出戰以精騎蹂之遂棄城突圍散走賁亨入城招散亡立官府章焱復合二萬眾來攻陣惡溪南賁亨分官拒守自將精銳亂流衝擊屬萬戶呼喇岱以援兵至自己至亥賊方退

文龍溺死呼喇岱以處即亂山為州無城壁可恃
且反側欲屠之賁亨曰我受命來監此郡賊固可
殺良民何辜不從將士擄掠子女金帛賁亨捕得
倡率者杖之仍各求所失還之州民悅服十五年
龍泉縣張三八合衆二萬殺慶元縣達嚕噶齊伊
蘇岱爾且屠其家賁亨將騎士五百往討與賊將
鄭先鋒陳壽山三千餘人戰於浮雲鄉斬首三百
餘級賊三戰俱敗軍還賊衆水陸俱設伏賁亨擇
步卒驍悍者使前賊不敢近既而衢州賊陳千二
聚二萬人遂昌葉丙六亦聚三千人助之賁亨前
後斬首三千級悉平之十
七年改處州路管軍萬戶

沃呼好古

括蒼彙紀至元間以中議大夫為處州路
總管始遷建郡治修飭學校有功於民而

士論尤
推重焉

石谷

遂昌縣志南陽人至元二十年任縣尹興學校施善政有訟者輒諭以理民感之

額延哈雅

崇禎處州府志大德初令松陽首捐俸經理縣治凡儒學公署莫不一新士民稱之

舒穆魯繼祖

元史舒穆魯宜孫傳繼祖字伯善襲父職為沿海上海上副萬戶初分鎮台州皇慶元年又

移鎮婺處兩州馭軍嚴肅平寇有功且明達政事講究鹽筴多合事宜為學本於經術而兼通名法

縱橫天文地理術數方技之說見稱縉紳間宜孫其子也

伊遜哈雅

崇禎處州府志太師恒陽文正王之孫至順初出掌龍泉縣事鋤強植善衆志孚服

蓮珠

崇禎處州府志家世唐古氏居廣平元統元年舉進士任安州同知轉松陽達魯噶齊蒞官政

德彰著民為立石者四曰善政曰新築宣公堤曰遺愛曰去思

殷輅

獻徵錄字乘之華亭人為上海縣吏歷鹽司橫浦調嘉興僧司僧告其族賊殺事吏獄四月餘

不白移輅獄輅徵得其賊而被冤者二十人悉平反出之又甲民訴乙民縛其子屍於水縣獄又不白輅鞠之乃他姓疾子為盜私捶殺而誣乙也良民有與盜首疑名者吏脫正犯而收之輅白諸長令即日釋去以省檄對調湖州舉廣東憲史檄且至以病辭乃以行中書選出長縉雲縣幕縣豪號兩虎者閉戶斂迹終輅三年不敢肆有富民坐令門豎捶殺平民連七人司隲吏欲出甲繫乙且以脫富民輅問故曰甲多子女繫之必有詞乙獨且鰥不慮也輅曰人苟以勢利殺無子者尚謂有天道乎遂正其法

杜百思

遂昌縣志至正十七年知遂昌縣歲大旱第川盜杜仲光聚眾殺人百思率弓兵禦之為

賊所執罵不絕
口遂死於難

明

孫炎

史槩字伯融句容人辟行省掾師克處州以炎為總制匹馬入城召父老諭以天命所集宜稟

教化不且為僂衆皆感悅仍擇健勇者練為兵紀律嚴明賊皆退縮時才俊士多伏居山谷中不肯出劉基章溫葉琛皆處士所推基尤有名使者再往返不起以一寶劍送炎炎作詩以為劍當獻之天子斬不順命者我人臣不可私受封還之草數千言諭基基就見置酒與飲論古今成敗之事基乃深服遂送基於京師上方征伐無一兵與炎止以口舌安反側郡壬寅賊畔炎被擒幽室中賊恐留之自遺患燭雁攜斗酒嗽炎曰以此與公訣炎拔劍割雁舉卮酒曰嗟乎我乃為鼠輩所陷賊

持刀視炎飲酒自如賊叱解衣炎罵曰此紫綺衣
主上賜吾當服以死何可解引枕而卧賊不忍伺
其睡乃害之年四十事聞追封
丹陽縣男妻為賊擒亦不屈死

王道童

祐蒼彙紀洪武初有功知處州
及苗軍作亂執道童不屈遇害

劉澤民

縉雲縣志宜興人洪武元年知縉雲縣事元
季縣治儒學皆燬於寇以次修舉措置有方

民不知勞親詣學宮勸課咸
以劉父稱之陞嘉興同知

石驥

嘉靖浙江通志字天驥濮陽人洪武初知松陽
縣明敏果斷吏民不敢欺凡有賦役務稽其實

民皆服
其均平

凌玉

嘉靖青田縣志洪武初知青
田縣興學勸農遺愛在邑

謝成

嘉靖浙江通志字德用定遠人從太祖克長興攻嚴州拔之洪武四年授處州守禦副千戶守

處領兵捕獲青田私鬻鹽寇周大豹等四百餘人寘於法民賴以寧從都督孫恪捕倭海上詔成守

禦平陽縣先是守平陽者以其濱海過於關防民動輒獲罪成至一切除去遠近安之

黃聰

崇禎處州府志賓州人通判處州清慎明敏有經濟才以興學為首士咸德之

魏明德

枯蒼彙紀洪武間為慶元縣丞創始立法愛民如子時青田寇葉丁香吳達三等作亂朝

命延安侯唐勝宗統兵勦捕侯以邑之二都與賊連境欲戮其眾明德直抵軍營泣涕白侯曰吾邑

民悉從化無從盜叛逆者公戮之是汙良民也請以身代侯重之遂寢民得生全

林復

枯蒼彙紀連江人同知處州廉能公恕剖事無滯去後士民咸思之

李納

嘉靖浙江通志洪武中知遂昌縣以恩信感化山砦七十餘所招復離民萬有餘家政績為最

劉仲濂

枯蒼彙紀武昌人洪武間知處州廉謹有為政尚寬平深得牧民之體尤以興學校為急

務官至工部侍郎

謝子襄

獻徵錄名衮以字行江西新淦人以才薦授青田縣知縣有惠政歲滿民奏留之陞處州

府知府居官廉謹拊小民興學校初郡多虎及早蝗為災子襄禱於神大雨二日蝗盡死虎亦遁去嘗有盜入庫竊官鈔子襄投檄城隍神盜方閱所竊於室忽風捲墮市中遂獲盜正其罪民鬻牛於市將屠之牛逸至子襄前俛首若訴者遣人問得實捐俸贖牛小校吳米逃山谷時鳩衆出為民患朝廷發官軍二千勦之處人大恐子襄力請止軍城中毋出而自以計掩捕之送京師兵不勞而民

以安性簡靜歷官三十年不以家累自隨永樂二十二年卒

倪孟賢

嘉靖浙江通志南昌人洪武中知麗水縣民有賣卜者嘗干謁富室不應所求乃詣闕告

大姓陳公望等五十七人聚衆謀亂命錦衣衛千戶周原往捕之孟賢聞原將至密召父老詢之父老皆曰無是事孟賢又微服往察見其男女耕織如故乃歸謂僚屬曰朝廷命孟賢令是邑惟欲撫輯斯民安於田里今使良善者受惡逆之名豈朝廷命孟賢意耶即具疏上聞復令耆老詣闕訴其妄上命法司論妄告者罪

韓時中

枯蒼彙紀洪武末同知處州廉潔公平督造海舟青器措置得宜民心悅服

黃謨

周瑛黃聲叔祠堂記字聲叔莆田人宣德中以明經授麗水縣學訓導天順中以教有成績陞

廣元縣教諭在麗水時浙寇張甚衆以謨有才畧
推以捍賊謨部署既定乃諭以忠義衆感激效死
鼓之而進賊奔
北境土以平

張祐

祐蒼彙紀舍山人正統間以給事中知處州嚴
毅有為丁外艱去後陳鑑胡作亂言必得如張
公者亂方可定當道交薦祐復來任統
領兵衆專制一方而賊遂服為之立碑

曹紘

祐蒼彙紀淮安人正統間同知處州遇事通解
若素習者每攝郡事決獄無留滯衆咸推服

鄭建

獻徵錄字弘中福唐人登進士改庶吉士出為
南雄通判時閩浙之交民盜銀礦相爭至有與

官軍拒者朝命處州專設通判一員以建蒞其事
既至諭民以禍福且首為平其力役民遂以寧銀
礦亦不勞而辦閩寇鄧茂七嘯聚流民越界攻掠
建時分守龍泉偕其子躬探甲冑率民兵與賊戰

斬首五百餘級龍泉以平秩滿將行巡撫奏留之陞同知改浙江按察司僉事有奸民不得逞者搆

詞危建致被逮事直再令復任既還以老病致仕

黎諒

柘蒼彙紀寧都人初任處州府推官斷獄明決正統間以殺賊陞通判後知瓊州

王俊

柘蒼彙紀涇水人正統末為青田縣丞剛直廉謹過山寇亂俊遍歷撫諭人心始安景泰初政

和賊吳全八誘脅本縣頑民同往瑞安劫掠復率民兵選其歸路而勦除之一境帖然

侯蓋

分省人物考字惟忠華亭人景泰進士同知處州屬邑龍泉慶元居民盜鑿銀礦恃險為亂鎮

守中貴欲請於朝盡勦絕之蓋願往諭禍福民皆散去秩滿擢鹽運司同知

楊殖宗

柘蒼彙紀莆田人由吏員任青田典史景泰初盜作率民兵守黃壇邀賊歸路有功陞主

薄後置景寧縣陞知景寧時經始創治大小衙門
成於一歲之間兵火之餘民多失所殖宗制伏豪

強撫綏良善
民獲安輯

顧立

李東陽顧侯祠記字成夫常熟人景泰初處州
寇作都御史軒輊置之幕下給餉有功時雲和

新置僻在山谷乃以屬之至則構解建學置驛傳
立壇墮百務咸備東有雲章道甚險民病樵採立

闢為
通途

馬聰

舊浙江通志江西人景泰間由御史
改調處州推官廉能仁恕吏民戴之

李信圭

枯蒼彙紀江西人正統間知處州
廉靜有為始立義塚人多感之

李葉

枯蒼彙紀豐城人景泰初為宣平知
縣時縣初設威行惠流吏民悅服

萬安

祐蒼彙紀京山人知處州府立心簡直政尚寬厚明敏善決獄圉圉空虛人稱之曰無牢萬父

被召去職老穉赴闕借留詔命還官安衣敝袍借二家僮步還城中衆皆譁呼曰此吾萬父也扶掖登堂泣政如舊

馬偉

崇禎處州府志故城人天順間知處州簡重廉明不尚苛刻以老致仕

周祺

祐蒼彙紀貴溪人成化間為處州通判剛斷有為後擢知本府修舉廢墜郡學一新

韓斐

祐蒼彙紀泰州人由御史知處州興學校培士氣祐之東鄉大堰久塞不通灌溉斐捐俸修築

民感其惠陞山東叅政

胡宗

獻徵錄字文德長洲人成化進士以監察御史左遷同知處州處故有曠穴官守之民忽他處

發地得礦中官即奏籍於官琮曰愚民偶有所獲
既非故穴其出不常一籍官則有常課一不登則
將取足於民民獲重困即上疏具言不可言甚懇
至從之以山西叅議致仕彭韶以都御史巡視兩
浙嘗以邑人為丞者屬琮琮黜之韶
不以為忤反益賢琮及去尤甚惜之

郭忠

枯蒼彙紀肥鄉人以戶部郎出守處州剛介有
威面如鐵人呼為郭黑面勤於政事審知民為
侵科所苦細查戶口糧差通融均定應納戶口給
一票縣官不得科派豪右不得侵漁民甚便之專
意作興人才士心感
奮以勞瘁卒於官

厲昇

獻徵錄字文振無錫人由太學生選知青田縣
民有周姓者與盤石衛軍訟五年矣昇聽之數
語遂服邑八都地報銀礦發監司臨焉術者謂山
木潤秀所產必廣昇曰吾聞金能剋木若金氣盛

木何得秀潤如此申辨數四必寢乃已鎮守中貴
歲以礦一至其邑所費不貲昇不缺禮而已至他
費歲率省昔之丰由是民安其業昇勸學興賢
旌舉節孝禮文亦彬彬焉請老民為立碑建祠

何昌

獻徵錄字克昌順德人舉人知麗水縣甫三月
以內艱去服除補宣平宣平故麗水分邑道出
麗水麗水之民爭迎焉為政寬厚無擾邑方草創
乃修學宮置祭器繕公署樹坊表庶務具興役之
以義民為盡力邑有劇盜毒痛閩浙諸郡縣矣不
能制昌設方畧擒之霖雨水溢漂民居先賑後聞
請減稅銀一千
餘兩九載致仕

韓綸

獻徵錄字緡之上海人以貢入國學選授處州
景寧縣主簿景寧險瘠而民獷因礦而盜綸捕
其尤者論法餘撫諭之皆帖服縣故多虎患綸設
法弭之縣每缺尹即綸署篆以庶勤聞時隣縣有

殺人獄三人悉論死處守梁某檄綸鞠之綸立釋其二曰法抵死者一人耳處屬十縣多宿逋御史委綸辦理甚嚴綸曰是徒驅窮餓於溝壑也曷若俟秋成帶徵乃具申詳會有詔蠲焉以疾請還民之思

陳仲堅

枯蒼彙紀福州人弘治初知麗水縣發摘如神吏民無敢欺者凡隣邑疑獄上司必檄往

核實每得其情還廣信通判歸貧不能自存

謝緝

崇禎處州府志樂安人弘治時以工部郎知處州清儉化俗自奉若貧士直道事人每見誅於

當道屢疏請老得休

黃芳

遂昌縣志字士英莆田人弘治間舉人以雲和令調遂昌才識通敏決獄如流凡學校城門皆

其勅建督民葬埋禁作佛事清理田糧罷征商稅為政知大體小事亦不遺擢太僕寺丞

范天錫

舊浙江通志冀州人同知處州明習法令吏民敬畏後陞南部副郎

何良輔

枯蒼彙紀江西人以進士任處州府推官體弱多病凡訊獄必求審詳毫不假借兼理鹽

務法無所屈病篤商人餽以金時不能言強起書於紙曰不可竟却之卒

何鰲

慶元縣志正德初知慶元縣先是賦稅無定式民病之乃平其田以二頃為一里彼此適均民

無偏累輕刑緩賦革弊省費擢御史至副都御史

李惟貞

枯蒼彙紀初授浦江教諭正德初知慶元宅心仁恕愛民如子凡干以私者悉斥之時早

行禱於薰山之巔伏烈日中不起須臾大雨是秋豐稔

陳傑

景寧縣志甫田人由進士正德間知景寧才識通敏為政一以愛民為主莅政三年始終一節

後擢南京

監察御史

戴鑾

遂昌縣志字時鳴廣西馬平人正德間舉人任遂昌教諭身率諸生教誨不倦葺學宮始竣值

火患不能救遂抱先聖先賢廟主及祭器而出私舍器物罄燬弗顧復力請郡守重建士子立石紀功

殷雲霄

枯蒼彙紀壽張人由進士正德間知青田縣有志操不阿上官愛民如子擢給事中父老

兒童擁馬號泣里中為之謠曰脫公靴將奚如公行無靴公行遲遲又曰脫公靴取其一隻匪遺其

一公不可再得

唐恩

崇禎處州府志嘉定人正德間知松陽操行廉潔保百姓如嬰兒雅有惠政奉養極菲機杼之

聲聞於外歲旱禱雨則雨注禱雪
禳災則雪應卒於官貧不能斂

曹濛

枯蒼彙紀句容人正德間知縉雲縣舊役畝數多寡不均濛不畏強禦悉為均之合邑稱便

吳仲

枯蒼彙紀武進人嘉靖初由御史知處州府精敏持大體片言折獄修築通濟堰舉數十年廢

墜不踰時而成作興學校勤於
課試擢湖廣叅政歷太僕少卿

張僕

舊浙江通志餘千人嘉靖初知宣平禁奸除暴吏畏民懷捐俸鑄文廟祭器陞興化府通判

潘潤

崇禎處州府志建平人知處州時方亢旱下車後即積誠祈懇大雨濡足後屬邑中旱核實報

荒果得減半蒞政扶弱鋤強力除民
害優禮學校士懷其德而吏畏其威

方遠宜

青田縣志字伯時欽縣人進士知青田縣事官居蔬食下車召富人取金銀酒器入署公

用三年給由北上分還前器富人伏地不敢取遠宜笑曰公宴上官不嫌美器數出數入吾懼廝役

輩乘間竊沒非有他也歲後施糜粥所活甚衆擢御史

陳思順

括蒼彙紀懷安人由舉人嘉靖初知雲和縣莅政公勤操履端潔節冗費均徭賦建學宮

修齋舍士民德之

朱世忠

舊浙江通志南昌人嘉靖初知龍泉縣清慎明敏平易近人民間貧乏而男讀女紅者量

以俸米給其家歷政始終如一

董德明

括蒼彙紀桂林人嘉靖間知處州府周恤民隱府縣常例蘆草悉盡曾次洞達四境安其

治理守郡五載
擢兵備副使

鄭鏊

青田縣志字亦鼎莆田人嘉靖間舉人知青田縣遇事即遺案不留牘有老農訟其子不養者

鏊出俸銀與之因對僚吏曰吾未仕時家貧舌耕以供菽水今食祿而親不逮養淚隨言下訟者父子相攜而出又富民田多隱漏詭澀

陳仁

括蒼彙紀茶陵人舉人嘉靖間知雲和縣守己廉潔慨邑小民貧條陳當道遂得減縣佐二員

訓導
一員

萬質

遂昌縣志字宜文清江人嘉靖間舉人知遂昌縣性行端方人不敢干以私民有爭者諭而遣

之五月政通事簡時按察行邑見其獄中草長過膝深加歎賞三年境無盜賊豪猾屏息

林性之

獻徵錄字師吾晉江人嘉靖進士知麗水縣不事擊搏而邑以治豪黠吏束手坐曹中至

不能具體廩山谷素捍文網之民有十餘年捕不能得而涕泣歸誠於性之一言者邑故有窰課後窰戶以課重徙盡則均其課於居人之不為窰者性之至會造籍里中以竄絕自言者三十餘戶吏以為無故減戶且得罪性之竟減之

周世遠

縉雲縣志江津人嘉靖間知縉雲少年蒞政練達如老吏心公守潔訟簡刑清

張紘

舊浙江通志字文儀上海人進士知處州清慎寡言薄於自奉男躬園圃女事機杼聽訟明斷

事上不阿以簡調睦州

池浴德

崇禎處州府志同安人嘉靖丙寅進士知遂昌縣清丈量設防守置木皂澤枯骨擢銓部

士民送至龍游依依不忍舍買地
置曳舟亭尸祝於邑東西明山

董琦

祐蒼彙紀山東恩縣人由嘉興府通判同知
處州厚重寬仁政務明允擢南戶部員外郎

王近思

崇禎處州府志崇陽人嘉靖中知麗水性
剛果心仁慈守潔政嚴吏民畏威懷德

陳元

祐蒼彙紀峽江人嘉靖間知慶元時值開礦民
苦油糧之費又以坑稅立定額使民稱貸益之

民愈不堪元請損其數
以蘇民困遂忤上官去

任良翰

崇禎處州府志電白人舉人嘉靖間知宣平
剖決精明人莫敢欺捐俸建學政事文學兼

備擢判

福州府

蘇民望

舊浙江通志南安人嘉靖間為宣平諭教
不倦攝縉縉雲邑事有剝煩之才挺立之操

魏良弼

柘菴彙紀字師說新建人嘉靖間知松陽興學恤民鑄造祭器葺修尊經閣東西號房闢

橋星門路春秋省耕斂別勤惰教民植桑凡聽訟一剖立斷諸役必擇樸厚者為之里中有小學諸

生稍慧者賞以紙筆百姓親如父母秩滿擢給事中

翟宗魯

崇禎處州府志博羅人舉人嘉靖中任宣平教諭卻飽周賁婚喪助俸培文明山鑿泮水

建聚英樓立澄心堂擢知融縣

萬鵬

柘菴彙紀武進人嘉靖間知松陽縣立心正大持已廉潔凡案牘必裁自己出催科用一緩二

調新
昌令

歐陽烈

柘菴彙紀泰和人嘉靖間署松陽教諭訓諸生以窮理力行為要遇祭祀必齋宿致虔祭

器祭品務躬閱之鑄爵若干以補其不足鼎新文廟厥功最多後官比部

譚孔言

青田縣志貴溪人舉人知青田縣政尚平恕每刑人哀矜形於色對僚屬嘆曰將無悞捷

耶時虎白日入境傷人孔言禱於神害遂息改官日殘書羸馬外無長物

容璚

遂昌縣志字廷圭新會人嘉靖間歲貢任遂昌主簿勤謹敦樸愛民禮士動遵古道去官囊無

餘資父老涕泣攀送不忍舍去

陳澤

括蒼彙紀南海人嘉靖中知慶元值山寇不逞率義士吳元輔統鄉兵往捕之斬首百餘級寇

乃平邑無城遂申當道鬻寺田公署故址充費不三月而成擢監察御史

張賀

括蒼彙紀龍溪人嘉靖間知松陽縣政尚寬簡對百姓恂恂然如家人暇輒詣學講藝出餘帑

重新文廟儉私養慎公費不徇額歛以阿上官凡使客應付符檄外不加毫末焉

吳從周

慶元縣志郇武人嘉靖間訓導署募慶元縣時山寇薄城誓以死守七日寇遁以城西在

山之下懼寇據其上申請當道改築於山巔捐俸首築二丈以為民式遂成保障之功陞國子監學正

杜時達

遂昌縣志上海人嘉靖末為遂昌縣主簿邑多積逋以漸追徵民樂輸納攝邑篆僅期月

聲稱大起去任時囊無一錢

陳烈

崇禎處州府志建安人以南御史任處州清里甲議條鞭復學田修水堰士庶沾恩遺思去後

孫琅

枯蒼彙紀豐城人隆慶初知麗水縣立三限以均徵輸修兩堰以通灌溉開立行市便民貿易

宣諭化俗仁聲藉
甚陞杭州府判

方亮采

遂昌縣志蒲田人由舉人隆慶間知遂昌縣
雅重學校乘量田後行八平新法歸額定里

手自裁定折獄每諭以人倫大義聞
者感悅入覲麾義金弗納至京卒

熊子臣

績處州府志江西新昌人萬厯間知處州府
修郡乘建譙樓創軍器庫政績最著陞雲南

副使

顧憲成

舊浙江通志無錫人以銓部郎謫處州推官
奉法循理上下藹然青衿以文贊者面為品

題多方誘掖有兄弟訟數年不決者呼謂之曰爾
手足也而自相爭既相爭盍自相治各授之杖謂
其兄曰為吾撲若弟謂其弟曰為吾撲若兄兩人
相顧愕然憲成故促之兩人叩首曰向者官為論

曲直故不服今知兄弟矣不知有曲直也令相揖謝乃抱持大哭即人化之

陳應芳

舊浙江通志泰州人萬厯間令金華復除龍泉愛民勤政布德施仁修理學宮優恤士類

擢禮部

主事

郭宗磐

崇禎處州府志晉江人進士以比部郎知處州府精明嚴肅鉗束佐貳官片紙不敢受嚴

溺女之禁草坊里供應家伏等費極為便民

吳之鵬

崇禎處州府志武進人任處州司理存心仁恕聽斷敏決上官委勘人犯多所株連片言

剖析輕重燭照平反生全者甚多公餘課士人服其鑑

任可容

續處州府志直隸懷寧人由工部郎知處州府省刑訟裁里供清奸弊歲早步禱多方救

濟培養士氣修學宮勅文昌閣時
有連理紫芝之瑞擢廣東副使

許國忠

績處州府志宣城人同知處州歷攝府縣篆
建議復浮橋於故址泊鹽船於上河修學築

壩止開採以杜釁
陳擢本府知府

鍾宇淳

績處州府志華亭人進士知遂昌縣廉明剛
斷庭無滯牘築通惠石橋勅寅賓館銳意造

士修學室建聚奎亭置學田以贍貧生又立
石西安縣界草巡檢司木排常例擢給事中

湯顯祖

遂昌縣志臨川人萬歷間進士授禮部郎建
言謫尉陞遂昌令下車惟較文賦詩而獄訟

庶務亦迎刃而解初尊經閣於學中建象德堂
於射圃置減虎祠啟明樓士民就射堂尸祝焉

李淳

績處州府志四川內江人由大理評擢知處州
府量寬識敏人不敢干以私盈庭案牘片言立

剖不忍輕入人罪政平訟簡吏畏民懷他若
修學宮濬泮池復浮橋銳然興理以外艱去

方淡然

青田縣志和門人舉人知青田縣慈祥練達
萬厯間大水廬舍田畝蕩析殆盡極力拊循

民得寧止改修學
宮城郭邑永賴之

周道長

績處州府志成都人萬厯間知慶元敦本課
農周助不給鰥寡孤獨尤沐其施值蝗入境

引咎額天羣鳥競
食殆盡稱異政焉

辜志會

遂昌縣志會昌人萬厯舉人知遂昌縣會山
賊劫掠修葺城垣為民防禦邑遂有保障陞

萬州
知州

華廷詔

績處州府志無錫人進士知龍泉以教化為
先建尊經閣復稽聖橋自奉寒素入覲嚮家

產以充路費
後卒於官

胡雲

獻徵錄字雨之無錫人舉人為松陽知縣松陽僻在山巖中數饑於水又屬開礦居人駭散雲

周旋撫諭僅而安集其諸閭校以礦事至者又競欲魚勃威雲以腹於民而土人之不逞者又陰唆之雲慷慨辨詰不少屈竟與抗禮雲又素廉撫拾無所得其人至相誠曰毋生事非他縣比也是以礦事首尾二年民不知擾松俗嫁女破產多不舉女有踰四十不能妻者雖良族亦以搶婚為常雲患之下令毋溺女溺女者重坐之又下令嫁女費毋過若干過者重坐之由是女亦浸育

陳見龍

崇禎處州府志潮陽人自建寧知府移知處州遇事精明廢興隆舉郡自己酉洪水城署

傾頽多方葺治不動官緡不程民力皆捐貲竣役凡聖賢祠廟城樓橋埠官亭公署煥然改觀至於

增兩庠賓興路費革漕運
餽遺公費衿弁咸被其賜

游之英

崇禎處州府志
歙水人以舉人知麗水縣時
歲屢歉賦額頻加之英戴星出入催科不擾

至修廢舉墜唯力是視聖殿傾圯捐金為倡他如
誠意祠麗陽祖祠好溪堰通濟堰下河官埠枯蒼
門大埠歲久坍塌咸加修葺丙子春苦水力請開
預備倉以賑不能前者施粥六門以食之夏苦旱
步禱齋宿誓神如約需足異虎傷人即額城隍
祠誠兵懸賞三日械虎至其積誠通神如此

姜師閔

景寧縣志字以孝江西進賢人由舉人萬曆
十一年知景寧性敏材裕草鹽舖戶除寺租

拓四所桑園築長堤建書院鑄祭器招流移均差
役減贖穀嚴吏書著提金鎖事以教民延名儒以
修邑乘善政多端
後陞台州通判

沈維龍

崇禎處州府志南安人萬厯間知慶元縣修邑乘置學田苞苴盡絕

龔廷賓

縉雲縣志晉江人萬厯間進士知縉雲縣重建賓館移置黉樓縣治煥然改觀其經畫荒

政疏通水利民尤賴之

段弘璧

舊浙江通志金壇人萬厯間知遂昌縣才猷敏達以德化民

張翼新

處州府志晉江人由舉人授處州郡丞遇事精明御下嚴肅值旱步禱得雨乃止歲賴有

秋

黃壽之

景寧縣志廣東瓊山人由舉人萬厯間知景寧為海忠介之壻清廉節愛綽有婦翁風時

民散田荒官民交困申請丈量合邑安堵陞本府同知後致仕

陳九功

績處州府志江西建昌人萬歷間由鄉舉知慶元公平明決實意御下尤加隆學校開渠

引水自馬巖而來注入學宮以增秀麗餘水散流市溝調繁麗水

張繼桂

崇禎處州府志同安人萬歷間進士知松陽縣均役清田徵糧息訟鞭朴不煩教化斯舉

林大佳

舊浙江通志隆安人單車赴松陽忠誠真率不輕怒訶人亦卒不能欺事皆獨斷形家言

松水過氣洩宜建塔青蒙山鎮之遂發俸錢倡始而塔成

鄭邦德

崇禎處州府志安東衛人縉雲丞治尚廉明引經按獄當道稱為科目遺才後擢望江令

龍奮河

舊浙江通志貴州舉人知縉雲縣練達周詳案無留牘撫循遺黎尤極盡心

方之壯

舊浙江通志上饒人萬歷間知景寧縣政務清嚴歷年丁田隱漏稽覈精明民無畸賦

張學書

崇禎處州府志平樂人萬厯間知慶元先是慶有商鹽之累官吏受賕役丁夫自龍泉轉

運抵邑困踣道途既而高價使舖戶屯賣鹽復穢惡食者多病商坐取盈額至傾家質子女以償學

書著鹽書上醴院每歲納鹽課二十四兩民間便之邑有班匠始編者悞重其六歲班錢為子孫累

學書力為申豁又礦稅徵溢數倍為裁損僅足額而止當道檄民充木大戶隣邑騷動學書申地僻

民貧不產巨木卒賴以免他如罷里甲蠲贖錢至割俸以充費莅任三年士民建祠祀之

雷叔聞

縉雲縣志南郡人舉人自雲和調繁縉雲縣法令嚴明聽斷果決釐奸詰盜境內肅然

袁遇春

舊浙江通志分宜人任處州推官廉明慈恕攝篆郡邑並著廉聲擢彰德郡丞

李質

續處州府志廣東普寧人由貢士知慶元縣簡易慈祥不阿強禦時有奸民以田投獻勢豪廉

得其實即上之當道以重法繩之權貴肅然

曾惟謙

續處州府志江西泰和人由鄉舉知景寧縣歲旱管履步禱雨果霑足有秋以士處山鄉

少有師授捐俸延師以教之偶以事至郡值霖雨止宿石塘夜夢神餉三頓鯉念少嘗戒不食固讓之遂投水中晨起舍陸而舟忽至九龍水勢大作顛危欲覆俄赤鯉四五浮水觸舟頃之波平獲免相傳以為神

吳尚友

崇禎處州府志江西湖口人知麗水縣寬洪厚重練達老成禮士恤民省刑節用合邑共

愛戴之陞南刑部主事

蔡應吾

舊浙江通志平和人知處州府獄不輕入人罪全活甚多覈官評却餽送待人恕而責

己周

文似韓

崇禎處州府志高安人任處州判有為有守每署各縣道路供給皆自齎毫不擾民為政

以寬為本

鍾武瑞

績處州府志湖廣雲夢人知麗水縣存心謹厚聽訟惟恐冤民必覆審再四擢知遼州百

姓攀轅泣道如赤子之慕慈母

傅時勉

崇禎處州府志無為州人崇禎間知松陽冰蘖自持撫小民極真摯詞訟願息者聽經旬

不用鞭扑夏旱停徵過大府檄取舊逋時勉曰此何時而克辦此詳請緩期竟以獲罪降調松人罷

哭市巷

盛可藩

崇禎處州府志桐城人以舉人署龍泉教諭待諸生若子弟當道以賢能委攝邑符三月

化行俗美捐鏹以賑貧士給米以活獄囚士民感戴擢南雍學正

陳以瑞

崇禎處州府志進賢人知麗水縣革火耗滌繁苛一意與民休息士以藝文贊者延接殷

勤或有闕說委曲謝絕吏肅民安調漳浦

王懋鋁

縉雲縣志金壇人由舉人天啟間知縉雲縣練鄉兵嚴保甲盜賊屏跡尤禁溺女立保嬰

冊所活甚多
擢工部主事

姚元引

舊浙江通志華亭人知麗水精明練達遇事有擔當草義餘興水利振人文人歌來慕

許有寰

崇禎處州府志揭陽人舉人通判處州五署邑篆秋毫不染所在見思職司糧鹽一切陋

規盡草署松陽捐貲修學比擢守滇
中捐俸買田以濟貧士及賓興津費

徐維藩

崇禎處州府志巴縣人崇禎戊辰以比部郎
知處州府遇事精嚴務情法得平上下允服

愛民禮士終始不渝陞雲南
副使卧轍攀轅畱寄思

鄭龍光

崇禎處州府志大田人崇禎初由明經知宣
平縣獄無滯囚三載政成捐俸置學田為課

士賓興津
送之費

康晉

遂昌縣志合州人崇禎初恩貢知遂昌清貞
絕俗儉約自甘訟牒勾攝兩造聽其自息

楊兆鯤

崇禎處州府志即墨人崇禎初由選貢知雲
和愛民如子時邑多流亡加意拊循遠近復

業

朱葵

崇禎處州府志丹徒人崇禎間以南戶部郎知處州府甌郡海賊震隣外省流民結寨佃種甚

多人情洵洵葵默運潛調出示安撫主客無譁地方以安省科罰節桁楊刻刑戒以示庶僚造浮橋置渡田民無病涉連年水火迭災親往勘踏賑恤凡城樓垣堡建葺一新捐貲修輯郡乘

陳學伊

舊浙江通志侯官人崇禎初知麗水粹潔端方嚴明整肅無重刑苛罰閭里獲安

王明汲

崇禎處州府志平樂人崇禎間舉人任推官署各縣篆多惠政署府持大體謹官常修造

浮橋贊輯郡志並著能聲

陳之恪

舊浙江通志武陵人崇禎間舉人知處州府寬柔溫厚樂與民無事而御下嚴整持體端

莊望而知為君子

汪宗明

崇禎處州府志泉州人崇禎間舉人知處州府飲人以和而持已嚴刻自俸薪外一無所

取二親迎養淡泊共甘艱去之日行索蕭然人以為會稽劉寵復見

許啟洪

遂昌縣志字任宇宜興人崇禎間舉人知遂昌縣值攢造編里聽民自相朋便以府差擾

害申請府廳各撥縣役聽差村落無擾

馬承緒

崇禎處州府志寧海州人明經歷河間別駕擢處州倅廉平嚴毅聽斷得情兩地有神明

之頌

張建高

舊浙江通志遼東人崇禎間任麗水訓導有才幹歷署邑篆討平黃村口山寇有功授松

陽令多善政

馬瑞麒

舊浙江通志祥符人處州府教授署雲和縣事招撫流亡清盜源瘞遺骸禱雨輒應

國朝

杜之璧

舊浙江通志河南人順治初處州府推官廉約自奉如儒素而案無煩牘有刑措風

朱宗時

青田縣志宛州寧陽人順治初由舉人知青田縣鎮靜有才畧初盜寇嵎起預為繕城後

濠寇至攻圍數晝夜露宿堅守民賴安堵後引年歸

趙如瑾

處州府志字卧齋直隸雄縣人順治三年以舉人知遂昌縣下車集士民博詢利弊逮一

二巨慙置之法羣不逞嘯聚逼城竭力堵禦遣役從間道走娶請兵殲擊不動聲色而黎民晏然歲飢設策賑救全活者萬計尤隆禮學校多士蒸蒸向風征賦不事析楊漸次鼓勸民自樂輸以卓異

擢御史

項始震

舊浙江通志麻城人進士順治初知縉雲時山寇縱橫鄉邑殘破下車招撫寇散民安民

間婦子散失者悉捐金贖還之陞大理府同知

徐可先

龍泉縣志武進人順治丁亥進士知龍泉縣當兵燹之後人多遷徙可先設義勇嚴保甲

民始復業尤加意拊循草宿弊戢戢卒與之休息邑有秋米舊解折色以兵興軍餉遂徵本色可先申請復舊捐俸重造濟川橋及鄉中之梧桐等橋待士子尤有恩

張元樞

處州府志良鄉人進士順治間任處州府推官仁廉明察視郡篆諄諄勸民遷善從正有

勾引營兵賭博者罪勿宥親臨屬邑踏勘荒田請蠲積逋寇氛未靖間有株連者輒肯宥之尤加意

學校葺建黌
宮設殿課士

周茂源

舊浙江通志字宿來華亭人順治己丑進士

十四年知處州府經山寇之後闔郡成墟錢糧無徵茂源抵任上請得免復竭力招徠捐俸每三戶給牛一頭每人給米一石十邑共報墾荒田一千九百頃有奇正供始得不虧是年寇入緡雲率鄉兵千餘奮勵死守賊宵遁十五年海鯨犯甌田賊不能犯

范達禮

處州府志遼東人順治十六年溫寇猖獗枯郡震動達禮以精奇尼哈番銜命領大兵援

枯時卒伍皆西北人民心疑懼達禮駐師二載紀律森嚴有不法者無少假貸市肆安堵鄰邑羣醜

聞風宵遁

汪宗魯

縉雲縣志
康明剛直遇事不阿
勒除巨魁張日新
金大

虎顧老三等縉始平定草弊釐奸
不遺餘力優禮士子陞沁州知州

王亮教

舊浙江通志
山東章邱人
順治間知宣平縣
政多卓異時防隣警亮教不用官兵選鄉勇

授以折衝方畧寇不敢犯

李翔

遂昌縣志
字天羽陝西城固人
順治辛丑進士
康熙八年知遂昌縣邑遭兵燹人逋田荒官民

胥困翔申請履勘題咨豁荒徵熟時苦現年賠累
翔復申請革除因田定里滾籤挨催積害盡捐殁
於任囊橐蕭然遠近醪
錢助觀歸里崇祀名宦

左朝極

表忠冊
陝西鎮番衛人
任處協右營把總
防守景寧縣
康熙十三年五月初八日與閩賊

蔡林二力戰陣亡事聞
賜祭葬贈威遠將軍廕一子以衛千總用

張景留

處州府志遼東人康熙間任松陽縣勤敏有聲當閩寇蹂躪之後招撫流移設立義學修葺學宮至力請蠲荒代償

舊通皆稱實政崇祀名宦



浙江通志卷一百五十七

欽定四庫全書

史部

浙江通志卷一百五十八

詳校官給事中臣戴璐

檢討臣德生覆勘

總校官編修臣倉聖脉

校對官中書臣李荃

謄錄監生臣任楫文

欽定四庫全書

浙江通志卷一百五十八

人物

名臣

爵無論崇卑必其言行功烈足以師表人倫經緯
天地而後名斯顯焉兩浙自漢唐以來敬歷中外
之臣著丹青而垂竹帛者列郡中踵相接也

皇朝任賢使能百工允釐實亮尤著彙而輯之均足光

昭川獄為後來者法則矣志名臣

杭州府

唐

褚遂良

唐書本傳字登善杭州錢唐入通直散騎常侍亮子授秦王府鎧曹叅軍貞觀中累遷起

居郎諫罷封禪遷諫議大夫兼知起居事帝曰朕有不善卿必記耶對曰守道不如守官臣職載筆君舉必書是時魏王秦禮秩如嫡羣臣未敢諫遂良曰太子諸王宜有定分帝曰有是哉公等為我求賢者保傳之於時皇子雖幼皆外任都督刺史遂良諫曰刺史民之師帥也皇子未冠者可且留京師教以經學養成德器審堪臨州然後敦遣帝嘉納詔遂良等定策立晉王為皇太子授太子賓

客進黃門侍郎叅綜朝政拜中書令帝寢疾召遂
良長孫无忌曰漢武帝寄霍光劉備託諸葛亮朕
今委卿矣高宗即位封河南縣公進郡公拜吏部
尚書同中書門下三品進拜尚書右僕射帝將立
武昭儀遂良曰皇后無他過不可廢帝不悅翌日
復言對曰陛下必欲改立后請更擇貴姓昭儀昔
事先帝身接帷第今立之奈天下耳目何帝羞默
遂良因致笏殿階叩頭流血曰還陛下此笏丐歸
田里帝大怒命引出武氏立乃左遷潭州都督徙
桂州未幾貶愛州刺史歲餘卒神龍中復官爵德
宗追贈
太尉

宋

謝絳

宋史本傳字希深富陽人舉進士甲科知汝陰
縣以薦擢秘閣校理出通判常州天聖中天下

早蝗起河決滑州絳上疏請下詔引咎罷役省斂
休息天下仁宗喜納之遷祠部員外郎通判河南
府雖在外猶數論事會郭后廢絳陳白華詩引申
后褒姒事以諷辭甚切至再遷兵部員外郎請罷
內降凡詔令皆由中書樞密院然後施行擢知制
誥判吏部流內銓吏部擬官舊視職由有無不問
多寡以是不均絳為覈其實以多寡為差其有名
而無實者皆不用人以為便請知鄧州按召信臣
六門堰故迹請復
修之未就而卒

楊大雅

宋史本傳字子正家錢塘進士及第歷遷秘書丞咸平中召試直集賢院知應天府還以

兵部郎中知制誥大雅初名侃至是避真宗藩邸諱詔改之居二歲拜右諫議大夫集賢院學士知
亳州卒大雅朴學自信無所阿附直集賢院二十
五年不遷有出其後者往往致榮顯或笑其違世

自守大雅嘆曰吾不學乎世而學乎聖人由是以
至此吾之所有不敢以薦於人而嘗自獻乎天子
矣天禧中使淮南遇風覆舟冠服盡喪時丁謂鎮
金陵遺衣一襲大雅辭不受謂以為歎宰相王欽
若亦不悅之萬厯杭州府志大雅十歲作雪賦及
長日誦萬言以乙科登第咸平三年交趾獻犀大
雅獻犀賦召試學士院明年獻所為文二十餘萬
言乃直集賢院仕終集賢院學士出知亳州卒所
著有入隱集職林
兩漢博聞若干卷

錢彥遠

宋史本傳字子高以父蔭累遷大理寺丞舉
進士第歷官尚書祠部員外郎知潤州時旱

蝗民乏食彥遠發常平倉賑救之部使者責其專
不為屈召為右司諫請勿數赦擇牧守增奉入以
養廉吏息土木以省工費遷起居舍人直集
賢院知諫院其任言職數有建明卒於官

謹按錢彥遠以下三人皆吳越王諸孫史不系籍貫咸淳臨安志槩從收入今仍之

錢勰

宋史本傳字穆父彥遠子以廢授流內銓主簿神宗召對將任以清要官王安石使弟來見許

用為御史勰謝曰家貧母老不能為萬里行安石知不附已命權監鐵判官奉使弔高麗餽餼皆弗納王遣二吏追餉金銀器四千兩竟卻之還拜中書舍人元祚初遷給事中知開封府老吏畏其敏召拜戶部侍郎進尚書加龍圖閣直學士復知開封臨事益精敏哲宗涖政翰林缺學士章惇三薦林希帝以命勰惇諷全臺攻之罷知池州卒於官

錢即

宋史本傳字中道第進士歷陝西轉運判官王師復銀州轉餉最徽宗召對問曰靈武可取乎

對曰願勅邊臣先為不可勝以待釁庶可得志帝然之除直龍圖閣知慶州至鎮築安邊城歸德堡

包地萬頃縱耕其中歲得粟數十萬徙知延安府
童貫宣撫陝西計司承望風旨減市價又行均糴
法賤入民粟而高金帛估以賞下至募兵射士之
授旧者咸被抑配關中騷然即抗章極陳其害被
貶睦寇作起知宣州進龍圖閣學
士以正奉大夫致仕卒諡忠定

沈括

宋史本傳字存中錢塘人擢進士屢遷集賢校
理察訪兩浙農田水利遷太常丞時大籍民車

又市易司患蜀鹽不禁欲盡實私井而輦解池鹽
給之言者論二事如織皆不省括侍帝側帝顧曰
卿知籍車乎對曰敢問欲何用帝曰北邊以馬取
勝非車不足以當之括曰古人所謂兵車者輕車
也五御折旋利於捷速今民間輜本重大日不能
三十里故世謂之太平車但可施於無事之日爾
帝喜曰人言無及此者遂問蜀鹽事對曰萬戎瀘
間夷界小井尤多不可猝絕也勢須列堠加警臣

恐得不足償費帝領之明日二事俱寢擢知制誥
為河北西路察訪使先是銀冶轉運司置官收其
利括言近寶則國貧人衆則囊索奸偽朝廷歲遺
契丹銀十萬以非北方所有故重而利之昔日銀
城縣銀坊城皆沒於彼使其知鑿山之利則中國
之幣益輕何賴歲餉鄰釁將自茲始矣詔可之遼
蕭禧來理河東黃嵬地留館不肯辭曰必得請而
後反帝遣括往聘括詣樞密院閱故牘得頃歲所
議疆地書指古長城為境今所爭蓋三十里遂表
論之帝召對喜曰大臣殊不究本末幾誤國事命
以畫圖示禧禧議始屈使行至契丹庭契丹相楊
益戒來議曰數里之地不忍而輕絕好乎括曰師
直為壯曲為老今北朝棄先君之大信以威用其
民非我朝之不利也凡六會契丹知不可奪遂舍
黃嵬而以大池請括乃還拜翰林學士出知延州
朝廷出宿衛之師來戍賞賚至再而不及鎮兵括

以為衛兵雖重而無歲不戰者鎮兵也今不均若是且召亂乃藏勅書而矯制賜緡錢數萬以驛聞詔報曰此右府頒行之失非卿察事機必擾軍政元祐中以光祿少卿分司居潤卒

陸誥

宋史本傳字介夫餘杭人進士起家簽書北京判官歷南北轉運使直集英院進集賢殿修撰

知桂州自儂徭定後交人寢驕誥至部集左右江四十五峒首詣麾下閱簡工丁五萬補置將吏軍聲益張交人遣使入貢知延州諒祚攻圍大順城誥謂不稍加折誚則國威不立乃留止請時服使者及歲賜而移宥州問故諒祚聞之大沮明年又乞留賜冬服而自以帥牒告之故諒祚始因誥謝罪共貢職改龍圖閣學士知成都青苗法出誥言蜀峽刀耕火種民常不足今省稅科折已重其民輕侈不為儲積脫歲儉不能償逋適陷之死地願罷四路使者詔獨置成都府一路熙寧三年卒

孫髣

宋史本傳字叔靜錢塘人用父任調武平尉歷福建轉運判官召為屯田員外髣微時與蔡京

善至是京還朝遇諸塗京逆謂曰我若用於天子願助我髣曰公誠能謹守祖宗之法以正論輔人主示節儉以先百吏而絕口不言兵天下幸甚髣何為者京默然既相出提點江東刑獄未幾入為少府少監戶部郎中縣官用度無藝髣疏論之當國者不樂徙開封遷太僕卿殿中少監知曹州徙鄆州邑人子為草祭之謠指切蔡京髣以聞京怒使言者誣以他謗提舉鴻慶宮致仕卒諡通靖

虞策

宋史本傳字經臣錢塘人登進士第歷湖南轉運判官召為監察御史進右正言數上書論事

哲宗納后上正始要言遷左司諫帝親政條所當先者五十六事後多施行累官吏部尚書奏疏徽宗請均節財用曰考皇祐所入三千九百萬而費纔三之一治平四千四百萬而費五之一熙寧五

千六十萬而費盡之今諸道隨一月所須旋為衰
會汲汲然不能終日願深裁浮冗以寬用度屬疾
祈外知潤州
卒於道弟奕

虞奕

宋史本傳字純臣第進士累擢監察御史提點
河北刑獄自何承矩創邊地為塘灤有定界既

中貴人典領以屯田開拓為功肆侵民田民上訴
屢出使者按治皆不敢與直奕曲折上之疏其五
不可詔罷屯田厯遷光祿卿戶部侍郎內侍總領
內藏視戶部如僚屬度支郎方討理滯奉中旨令
開封尹與總領者來奕白宰相曰計臣不才當去
之而易能者不可使他人侵其官即自劾不稱職
詔罷內侍徙奕工部集慶守張滌請登封東平守
王靚諫以歲凶多盜不當請封為政者將罪靚奕
言靚憂民愛君所當獎激奈何用
為罪乎靚獲免卒贈龍圖閣學士

張九成

宋史本傳字子韶其先開封人徙居錢塘游京師從楊時學權貴託人致幣曰肯從吾游

當薦之館閣九成笑曰王良尚羞與嬖奚乘吾可為貴游客耶紹興二年對策擢首選授鎮東軍簽判提刑張宗臣欲逮捕數十人九成爭之宗臣曰此事左相封來九成曰主上屢下恤刑之詔公不體聖意而觀望宰相耶即投檄歸趙鼎薦召遷著作郎言陛下以省刑為急而理官不以恤刑為念欲詔理官活幾人者與減磨勘從之權刑部侍郎法寺以大辟成案上九成請覆實果誣服者金人議和九成謂趙鼎曰金實厭兵而張虛聲以撼中國因言十事彼誠能從吾所言則與之和使權在朝廷鼎既罷秦檜誘之曰且成檜此事九成曰九成胡為異議時不可輕易以苟安耳檜曰立朝須優游委曲九成曰未有枉已而能直人上問以和議九成曰敵情多詐不可不察因在經筵言西漢

災異事擢甚惡之謫守邵州丁父憂免喪檜令司諫詹大方論其與徑山僧宗杲謗訕朝政謫居南安軍在南安十四年廣帥致羸金九成悉歸之檜死起知溫州戶部遣吏督軍糴民苦之九成移書痛陳其弊戶部持之九成即丐祠歸數月病卒九成研思經學多有訓解寶慶初特贈太師封崇國文忠公諡

何鑄

宋史本傳字伯壽餘杭人政和五年進士第歷官殿中侍御史擢右諫議大夫尋拜御史中丞

先是秦檜力主和議大將岳飛有戰功金人所深忌檜惡其異已欲除之脅飛故將王貴上變逮飛繫大理獄命鑄鞫之閱實俱無驗鑄察其冤白之檜檜不悅曰此上意也鑄曰鑄宣區區為一岳飛者強敵未滅無故戮一大將失士卒心非社稷之長計檜語塞改命万俟卨飛死獄中檜諷高論鑄

私岳飛為反欲竄諸嶺表帝不從止謫徽州
後提舉江州太平興國宮卒嘉定初諡恭敏

凌景夏

咸淳臨安志字季天餘杭人紹興二年對策
第二擢秘書省正字遷著作佐郎與胡理朱

松張廣常明范如圭等六人共奏封事言和議非
便秦檜憾之斥知外郡及閒居凡十餘年檜死除
起居舍人未幾直龍圖閣知鼎州奏免程昌禹所
增蔡州官兵衣糧六萬四千餘緡詔減四分之一
除吏部侍郎奏論吏部七司有法有例法可按籍
而視例則散於案牘之中匿於吏胥之手官有去
來不能遽知臣愚以為吏部七司宜置例冊凡經
取旨或堂白者每一事已命郎官畫時擬定長貳
書之於冊以為例每半年上於尚書用印給下如
此則前後予決悉在有司之目猾吏無所措巧銓
綜漸以平允詔
吏部措置申省

樊光遠

萬厯杭州府志字茂實錢塘人紹興五年南
省奏名第一除秘書省正字上疏言今日士

大夫之論莫不以金人詭詐為可憂臣獨曰詭詐
不足憂而信其詭詐實深可懼也願陛下勿以得
地為喜而常以為憂勿罪忠謹以養敢言之氣勿
喜迎合以開濫進之門勿盡民力宜愛惜之以固
根本勿沮士氣宜聳動之以備緩急秦檜將遂休
兵罷為閬州教授後召為秘書丞除監察御史尋
補外知嚴州時三衙誘掠近郡平民為軍光遠奏
乞禁止詔三衙自今止見管兵為額又言本州歲
輸御爐炭七萬四千五百斤
而不償民間之直上亟罷之

趙汝談

宋史本傳字履常登淳熙十一年進士第調
汀州教授佐丞相趙汝愚定大策汝愚欲驟

以詞掖處之力辭汝愚去國惟黨禍斥去尋召為
太社令時侂冑用事熾甚汝談痛憤登壇讀祝大

呼侂胄及陳自強名自強不能堪以叅知政事李璧薦召試擢正字改知無為軍獻料敵備邊二策歷湖北江西提舉賀理宗表力寓勸戒端平初以禮部郎官召對言倚用老成廣集忠智願加聖心又言大佞似是忠大奸似聖擢任之始未見甚失乃寔至差謫則是非邪正易位而黜陟予奪失中多矣改秘書少監時集議出師汝談反覆言不可輕戰而和尤非計既而三京收復雖前言用兵不便者亦喜汝談獨有憂色未幾洛師敗始服其先見遷宗正少卿權吏部侍郎陞侍讀朝議履畝稱楮汝談言非便迺時宰意京師軍變宰相乞貶秩汝談持不可草答詔以為貶秩易審舉措難宰相滋不悅以言去起知婺州召權禮部侍郎登對首疏言邊曲無可倚仗乞超越拘攣簡拔俊傑使各分方面巴蜀一人荆襄一人兩淮各一人一切便宜行事不復更從中御庶幾伸縮由已機用出心且

曰臣之此策行於開禧未用兵之前決不至罹今日之患其論諸法尤中時弊上稱歎久之以老祈免改侍講權給事中權刑部尚書

及卒轉兩官遺表上又轉四官

謹按汝談史缺系籍考咸淳臨安志云太宗八世孫居餘杭嘉熙元年卒景定四年諡文懿足補史氏之缺云

俞烈

咸淳臨安志字若晦臨安人淳熙八年試禮部

第一嘉定初知慶元府鎮以清靜移知鎮江時

淮民流移充斥多方拯救郡有大夾岡小夾岡乃漕運路雨餘泥深牽夫失足輒墮數十尺下烈為

甓之始無陷溺權吏部侍郎乞濬練湖通漕廣溉兼中書舍人熱戚濫恩貂璫佚罰官掖黃緣干請

多格不行尋兼侍讀卒

趙希館

宋史本傳字君錫舊名希喆登慶元二年進士第改賜今名調汀州司戶峒寇李元礪方

起郡會僚佐畫守城策希館下坐曰守城非策也距城三十里有關曰古城若悉精銳以扼其衝賊不足慮矣守以付希館希館嚴兵以待賊至矢石俱下無一免事聞詔升推官改知玉山縣召對首言民力困於貪吏軍力困於饋餉國家之力則外困於歸附之卒內困於浮冗之費寧宗嘉納之授大理丞歷團練防禦使理宗即位進安德承宣使引對言初政急務莫先於明道統總治統收人心上為之動容後升節度封信安郡公

謹按希館史亦不著籍貫
今從萬歷杭州府志收入

洪咨夔

宋史本傳字舜俞於潛人嘉定二年進士應博學宏詞科崔與之辟置幕府尋知龍州

歲貢麩金率科礦戶容夔曰將奉上乃厲民出官
錢市之毀鄧艾祠更祠諸葛亮告其民曰毋事仇
讎而忘父母還朝為秘書郎遷金部員外郎會詔
求直言慨然曰吾可以盡言悟主矣其父見其疏
曰吾能喫茄子飯汝無憂史彌遠讀至濟王之死
非陛下本心大恚擲於地轉考功員外郎轉對復
言李全必為國患於是臺諫李知孝梁成大交論
錫二秩讀書故山七年而彌遠死帝親政五日即
以禮部員外郎召見帝問今日急務對以進君子
而退小人開誠心而布公道且言在陛下一念堅
凝又問在外人物對以崔與之真德秀魏了翁翼
日拜監察御史容夔感激知遇曰朝無親擢臺諫
久矣亦當極本窮源而先論之乃上疏言中書樊
端其大者有四曰自用自專自私自固願於徙容
論道之頃宣示臣言俾大臣力懲往轍帝嘉納之
又首乞罷樞密使薛極以厲大臣之節其他得罪

清議者相繼劾去朝綱大振擢殿中侍御史後
進刑部尚書拜翰林學士加端明殿學士卒

李宗勉

宋史本傳字彊父富陽人開禧元年進士歷
遷著作郎入對言邊事明年兼權兵部郎官

李全叛謀已露人莫敢言宗勉獨累疏及之拜監
察御史時方謀出師汴洛宗勉言今士卒未精銳
城壁未繕修守禦猶不可而欲進取乎願詔大臣
愛日力以修內治合人謀以嚴邊防仍飭沿邊將
帥毋好虛名而受實害已而洛師潰又言何地可
控扼何兵可調遣何將可捍禦何糧可給餉皆當
預作措置畫拜殿中侍御史詔條陳邊事宗勉奏請
分上流淮東淮西為三帥而以江淮大帥總之以
公私之財分給四處俾之招募充補仍選沿流諸
郡將士為扞禦之圖或謂其勢强盛宜於講和欲
出金縢以奉之是抱薪救火空國與敵矣擢諫議
大夫進簽書樞密院事史嵩之開督府力主和議

宗勉言嵩之職在督戰如收復襄光控扼施澧招
集山砦保固江流皆今所當為若所主在和則凡
有機會可乘不無退縮之意必至虛捐歲月坐失
事功進叅知政事拜左丞相兼樞密使守法度抑
僥倖不私親黨召用老成尤樂聞讜言以
觀文殿大學士致仕卒贈少師諡文清

章鑑

兩浙名賢錄字君寶昌化人嘉定十六年進士
調溫州永嘉簿歷官國子司業兼侍講進太府

卿以言免歸端平更化首上封事復召為講官兼
掌內外制時相專政極論其蠹國且乞罷職嘗上
疏言進人不可太銳聽言不可不察擢兵部侍郎
兼給事中文華閣待制以疾丐歸卒鑑為人忠直
淳厚事有切於時者必為精言之時相疾其正論
每詠以禍福鑑不為動深為理宗所知特見親禮

趙景緯

宋史本傳字德文於潛人登淳祐元年進士
第授江陰教授丁母憂以祿不逮養服闋不

調景定元年特授秘書郎知台州以化民成俗為
先務建黃巖縣社倉六十有六浚河道九十里築
隄路三十里節浮費為下民代輸秋苗奏捐五邑
坊河渡錢進考功郎中兼崇政殿說書論監司守
令曰與其糾劾於有罪之後而未必盡得其情孰
若精擇於未用之先而使之各稱其職事出於柳
應詔上封事曰願陛下捐內帑以絕壅利之謗出
嬪嬙以節用度之奢弄權之貂寺屏之毒民之恩
澤侯黜之擇忠鯁敢言之士置臺諫選慈惠忠信
之人為守宰又必稽乾淳以來凡利源名窠之在
百司庶府者悉隸其舊公田派買不均之弊聽民
自陳隨宜通變咸淳元年拜宗正少卿兼權中書
舍人封還濫恩詞頭帝從之雷發非時又言內批
疊降而名器輕宮闕不嚴而主威褻橫恩之監已
收而復出戢貪之詔方嚴而隨弛命令不疑則陽
縱而不收主意不堅則陰閉而不密陛下可不思

致災之由而並正之哉進權禮部侍郎顯文閣待制卒諡文安

洪勳

咸淳臨安志字伯魯容夔長子登淳祐四年進士第少為崔與之魏了翁所知仕至兵部尚書

嘗為詞臣發明先皇與子之意人稱其有父氣骨卒贈端明殿學士諡文清

元

葉李

元史本傳字太白一字舜玉杭州人補京學生宋景定間伏闕上書攻賈似道被竄潭州宋亡

歸隱富春山至元中召見詢以治道李厯陳古帝王得失成敗之由世祖首肯時各道儒司悉罷李因奏各道儒學提舉及郡教授實風化所係請復立提舉司專提調學官課諸生上成於太學以備錄用凡儒戶徭役乞一切蠲免可其奏累擢尚書左丞始定至元鈔法又請立太學薦周砥等十人

明

為祭酒等官帝皆從之世祖欲徙江南宋宗室大姓於北方李言宋民無故聞徙必將疑懼萬一奸人乘釁而起非國之利事遂寢陞平章政事李固辭許之以疾得請南還卒追封南陽郡公諡文簡

夏時

萬厯杭州府志字以正錢塘人永樂戊戌進士授戶科給事中洪熙改元議改鈔法時力言其

擾市肆無裨國用疏留中不下已而泉幣大阻民輒犯禁於是始思時言命侍太子祀祖陵所至遇歉輒建白發倉賑之留署南戶科宣德初一日三上封事稱旨命署尚寶司兼吏禮兵刑四科事身視七篆綜核靡遺事無愆滯六年查後湖黃冊陳便宜十四事詔行之擢江西僉事進叅議以大臣會薦起擢廣西左布政使前後所上又十餘疏皆國家機要事識者偉其敢言年未七十致仕歸卒

周文

萬歷杭州府志字顯謨富陽人永樂癸卯舉人選河南道監察御史巡按廣東赫著聲績時中

官王振方用事文疏論之貴州苗賊猖熾總帥僨師命文督兵偕靖遠伯王驥往勦至則單車詣賊宣諭國威賊果歸款未幾以憂歸卒於家

趙新

兩浙名賢錄字日新富陽人由國子生授工部主事擢吏部郎中歷吏部右侍郎巡撫江西綜

核吏治使百司無廢務臨事籌畫每中機宜長於合變至以漕淮之舟運西江之粟使兵農兩利民甚便之仕終吏部尚書

柴車

湯斌柴車傳字叔輿錢塘人永樂二年以舉人授兵部主事歷兵部侍郎奉勅往山西遼東甘

肅清屯飭邊所至皆有實績正統元年多爾濟巴勒寇涼州命尚書王驥等經畧而以車叅贊軍務副

總兵劉廣援鎮番遇寇而退反冒功邀賞車勅其
罔上不法寧夏守將胡清滕遲喪師失律鎮守太
監王貴部下齊音布哈等叛亡復歸貴匿不以聞
車並劾奏帝嘉其公忠賜白金文綺旋以敗多爾
濟巴勒功進一級車盡心邊務尤杜絕徼幸凡有
功賞雖奉詔必覆驗而後行詐冒者必據法糾正
氓州土官后能以家人冒功得陞賞車奏罷其所
陞官能復以為請帝宥之車反覆論其不可曰詐
冒如能者非一人臣方次第按覈今宥能如諸人
何若無功得官則捐軀死敵者何以待之帝深嘉
其忠復賜白金文綺三年進兵部尚書
書仍叅贊軍務事平召還理部事

沈升

兩浙名賢錄海寧人永樂初進士由庶吉士授
刑部主事累遷至太僕寺少卿升立朝好獎拔

善類凡同年同官中有文武才能堪為時用
者亟疏薦之後皆不負所舉人多賞其鑒識

嚴恭

兩湖塵談仁和人永樂辛卯進士授御史命巡按江西有巨奸姻連藩府獄久不決恭卒致大

辟後王師征麓川恭往司紀功凱旋衆議當擢臺省時王振怙勢謂人曰嚴御史好官今有功當陞侍郎胡不見我所親或以諷恭竟不往止得貴州叅政以去

鄒幹

兩浙名賢錄字宗盛餘杭人正統己未進士授兵部主事歷郎中己巳車駕北狩京師戒嚴擇

廷臣有才望者佐本兵僉舉幹通敏練達乃超拜本部右侍郎時寇騎壓境城門晝扃城外老幼數萬餘不得入望堞而號衆議莫敢入幹曰設城本以衛民今棄民於敵可乎適軍出就芻乃下令軍從左出民從右入全活無算幹曉暢軍機臨事合變當守城時常不待奏報輒行事賴以濟改禮部右侍郎河南鳳陽等處大水受命往賑奏蠲稅糧數萬石尋轉左成化丁亥特拜南京禮部尚書召

還後加太子少保致仕歸
卒贈太子太保諡康靖

夏時正

王鏊夏時正墓誌字季爵世家慈谿至其父始遷仁和正統乙丑進士授刑部主事進郎

中慮囚福建平反殊死獄六十餘人時上抗民飢盜且起時正不及以聞亟發倉賑給厯陞南京大理寺卿成化七年被命巡視江西黥官屬貪濁者二百餘人放免無名稅十餘萬增築南昌瀕江隄及豐城諸縣陂岸復疏時弊二十事以聞當道有不悅者遂三上章乞歸分省人物考歸仁和僦居民舍布政使張瓚為西湖書院於孤山處之家食三十年卒年八十八

江珙

萬厯杭州府志字用良仁和人景泰辛未進士授禮科給事中嘗以六事疏陳悉關君德民務

已而諫罷僧牒濫行疏救按察使陳璇寬又劾奏石亨怙寵罔上直聲赫然時南陽李賢方柄事象

爭趨其門獨此不可曰吾為諫臣可媚時宰以自託耶居諫垣十年出為山東叅議又九載始遷叅政未幾乞休以子瀾貴贈大中大夫

何琮

獻徵錄字文璧仁和人景泰甲戌進士授禮科給事中正色敢言多所封駁成化中進左通政

掌司事承規矩廢弛之後涖之以嚴宿弊頓革陞兵部左侍郎

沈銳

分省人物考字文進仁和人成化己丑進士授刑部主事歷陞江西廣東按察司僉事銳方介

寡合拙於進取為五品者二十四年乃稍遷副使進廣東布政尋陟應天府尹正德初進南京刑部右侍郎值劉瑾用事銳上疏極言時政不報遂乞歸瑾鈞擿往事誣之矯旨奪職嘉靖初論舊德復官

吳雄

獻徵錄字文英仁和人成化戊戌進士授刑部主事陞湖廣按察使郴州蠻侵掠居人有司蒐

捕窮詰其黨欲盡致之死雄言於巡撫第取首惡誅之餘無所問拜應天府尹南畿旱總漕者亟征兌運米雄曰民困已甚不可重擾表止之又請兩淮所貯綱米三十餘萬石以賑飢者全活甚衆

江澗

萬厯杭州府志字文淵仁和人成化戊戌進士選庶吉士厯陞學士正德初陞詹事府少詹事

晉吏部右侍郎守官勤慎嚴箠不通尺書著錄曹日錄以自檢雅不善逆瑾改南京禮部尚書厯任三十餘年不治產業曰吾不欲以是上負先德下累子孫也卒贈太子少保諡文昭

李旻

嘉靖浙江通志字子陽錢塘人成化甲辰進士及第授翰林修撰厯兩京國子祭酒明習典禮

振舉師模仕至南京吏部侍郎白鉞李旻墓誌旻貳南太常時值孝陵水災遣朱輔代祭幾紊儀等

吳特疏於朝遂定
兩京遣祭之儀

宋惠

分省人物考字懿卿仁和人成化丁未進士擢南湖廣道御史時內豎將琮守備南京以威權

排逐縉紳事多不法惠抗疏劾之權奸股慄弘治丙辰轉湖廣僉事值藩府二役並興民不堪命即

為檄請罷
止卒於官

俞琳

獻徵錄字德彰臨安人成化丁未進士授監察御史按行畿輔發奸擿伏貪橫斂迹正德戊辰

陞禮部右侍郎改工部畿輔諸郡告飢盜且起上命兼右僉都御史往賑飭武備廣儲積未旬月間

諸郡安堵保定有張義官者潛結羣盜為奸琳捕殺之盜遂息召陞工部尚書加太子少保致仕

陳珂

分省人物考字希白錢塘人弘治庚戌進士授刑部主事累官右副都御史巡撫河南適流賊

餘黨孫郁等為民梗首命兵勦平之仍命有司收
瘞餘骸勒石表男女死節者又申冤獄知縣袁鑑
等五十餘員俱奏請得末減新野當荆襄之衝內
官私置抽分廠漁獵民擻守巡官毀之正德十年
入為大理
寺卿致仕

胡世寧

獻徵錄字永清號靜菴仁和人弘治癸丑進
士除德安府推官時岐王開國羣從怙勢橫

甚世寧悉以法裁之王請民間開墾湖田充柴炭
撫巡業予之世寧指畫利害乃止陞主事歷員外
郎中出知廣西太平郡所隸悉土官世寧推心撫
之夷獠帖然惟太平知州李璿負固跳踉乃密檄
龍英州趙元瑤扼而執之積禍頓息又建置壺關
屹然為一方巨防母喪服闋補寶慶初朝岷王聞
岷府受詞繫人取財即諭里老奉有令旨必并其
人送府驗實啓行偽者弗貸岷府人相戒欽手郡

屬糧則繁漫姦不可詰乃類田均糧一色徵之民
省歲供之半陞江西副使時羣盜肆抄掠為饒信
患世寧設計擒之又城廣昌南豐新城會宸濠有
反狀人莫敢言世寧獨上疏曰江西之禍不止盜
賊可慮者寧王臣請勅王自治其國勿撓有司以
防未然當事下其章濠恚甚構飛言誣為離間逮
捕禁獄欲別附他罪給事御史交訟其寃得減死
戍遼東宸濠反特起戍中為湖廣按察使尋進右
僉都御史巡撫四川嘉靖元年晉吏部右侍郎未
任奔父喪時議大禮廷臣諍論多被扑除名世寧
時家居疏言新進議禮一言適合未必事事皆是
老成執禮一言過當未必事事皆非凡數千言上
嘉納之四年起兵部左侍郎進備邊二十五事獻
三經講義辭多中羣忌皆留中言者劾之改南吏
部左侍郎徵為左都御史掌院事執政請禁私謁
世寧言臣官以察為名人非按其貌聽其言無以

察其心之邪正才之短長若屏絕士夫徒按考語則毀譽失真而求激揚之當難矣上是其言改刑部尚書陳九疇者故以兵備甘肅兩敗土魯番兵土魯番縱反間傾九疇於是下九疇獄擬大辟世寧昌言於朝曰使世寧司刑而殺一忠臣寧先殺世寧執政持不可乃密疏為申理九疇得不死戍邊轉兵部尚書加太子太保引疾致仕卒贈少保諡端敏

江曉

萬厯杭州府志字景熙仁和人正德戊辰進士歷兵部郎中改吏部出為山東叅政議召商上

納隨時給估除前攬納侵耗之弊遂著為令陞山西右布政使條陳體國便民六事悉見施行擢應天府尹除奸釐弊節費勸農復條奏職掌十事入為工部右侍郎為胡守中誣奏勒歸卒贈尚書

錢宏

兩浙名賢錄字可容錢塘人正德戊辰進士授刑部主事轉員外郎陟山東僉事轉副使時武

宗南狩供應靡紀當事撤宏取辦隨事經緯弗能
屈章丘潦歲大侵宏賑恤有方全活幾萬巨璫鎮
守役民無常時宏裁之不少徇厯陞副都御史提
督南贛軍務南贛地屬上游不可一日弛武備乃
刻武藝圖以訓將士躬自臨
閱軍聲大振會疾作乞歸

陸溥

兩浙名賢錄字元博錢塘人正德戊辰進士授
兵部主事時寘鐸謀不軌逆瑾內應齊魯趙魏

賊從中起溥相大司馬運籌決策羣允以次授首
溥之力居多既而駕將南征溥與同省郎伏闕諫
止廷杖幾斃會丁內艱歸服闋補武選司員外厯
郎中出為江西叅議嘉靖初詔獎先朝諍臣改陝
西叅政行至靈實卒年僅四十有五與溥同
扶者為仁和江翰林暉君子以為杭之二直

許相卿

萬厯杭州府志字台仲海寧人正德丁丑進
士授兵科給事中屬世宗新政乃抗疏論政

令不便者數事先是中人張銳張忠恣橫法曹議在死律內降欲當之贖金相卿力爭之又李賢以中貴義子襲錦衣指揮林俊以正人被譖相卿皆力言其非是語剴切多人所不敢言由是直聲振天下居一年抗疏致仕歸林居三十年中外薦者十數以禮科召力辭竟不起

江暉

兩浙名賢錄字景孚仁和人尚書濶子侍郎暉弟正德丁丑進士選庶吉士與同館舒芬等抗

疏力諫武宗南巡受杖幾斃謫廣德知州下車即法其豪梗者以令於州省徭役減供應以身勤民民皆悅服二載以編修召尋進修撰屬世宗簡侍從使更民事擢暉河南僉事未行疾作許歸卒列朝詩集傳暉為文鈞元獵秘雜以古文奇字聲牙詰曲與汴人曹嘉東楚王廷陳秦馬汝驥齊名一時有曹王江馬之稱集名亶爰子

邵經邦

汪琬邵經邦傳字仲德仁和人正德庚辰進士授工部主事進員外郎嘉靖三年詔工部

治泰和伯陳萬言賜第費當白金六十萬經邦力諫不宜寵外戚太過由是直聲大起內艱服闋補刑部明倫大典告成之次年十月朔日食經邦抗疏言陛下已令大學士張璉致仕尋以議禮有功見留夫陰盛侵陽變無大於此者是以漢制策免三公而璉顧去而復留何也臣竊謂議禮與臨政不同議禮貴當臨政貴公陛下私議禮之臣過加非分使之履盈蹈滿干犯天人之怒微獨非國家福也亦豈璉輩利哉疏入帝怒立下詔獄會乾寧宮西房災乃命遣戍鎮海衛於時學士豐熙先戌其地踰七年刑部尚書唐龍等乞放還熙經邦等不許又踰二十八年竟卒於戍所神宗即位復故官萬厯中鎮海衛人立祠祀經邦與學士豐熙主事陳九川為三賢二人亦以謫戍至鎮海者也理

學見聞錄經邦戍鎮海建寧楊偁菴曰昔期望祗是科目中人今却是聖賢地位因益研精覃思成三弘錄易春秋直解學者稱弘毅先生

張瀚

湯斌張瀚傳字子文仁和人嘉靖乙未進士授南京工部主事歷遷右副都御史巡撫陝西甫

半載入為大理卿歷總督漕運隆慶元年改督兩廣軍務萬厯元年為吏部尚書加太子太保時廷推吏部尚書首左督御史葛守禮次工部尚書朱衡次瀚張居正惡守禮慙厭衡驕故特拔瀚比居正遭喪謀奪情中旨令瀚諭留居正居正又自為牘風瀚屬吏以覆旨請瀚佯不喻謂政府奔喪宜予殊典禮部事也何關吏部居正復令客說之不動乃傳旨責瀚久不奉詔無人臣禮廷臣揣恐交章留居正瀚獨不與撫膺太息曰三綱淪矣居正怒嗾給事中御史撫他事劾之勒致仕歸年及

八十卒贈太子少保諡恭懿

傅佩

兩浙名賢錄字朝鳴仁和人嘉靖乙未進士授興化知縣擢兵科給事中世宗幸承天佩以才

望扈從武定侯郭勛怙寵驕恣不法佩抗疏劾之忤旨奪職郊廟禮成還章服穆宗改元起用先朝言事直臣佩膺首薦晉秩太常寺少卿致仕

童漢臣

舊浙江通志字重良錢塘人嘉靖乙未進士為江西道御史時敵寇鴈門簡按山西為設

方略斬級奪還子女既而條陳邊計歸咎宰輔嚴嵩疏入嵩大啣之謫楚藩都事聞父計奔歸家居十年起廣東都事累陞江西副使以母老乞歸

查秉彝

獻徵錄字性甫號近川海寧人嘉靖戊戌進士除黃州司理徵拜禮科給事中屬朝議莊

敬太子冠禮時未知上意所指莫敢先發且憚繁
節論如桀舍秉彝斟酌今古折繁簡而衷之疏上
報可轉戶科會大計羣吏條吏弊七事以上復與
都給事厲汝進右給事徐養正合疏劾兩淮副使
張祿起解鹽課令私親至京廣通關節太常少卿
嚴世蕃憑藉父勢有請托踪跡宜盡法窮治疏入
杖闕下嵩以疏出秉彝手必欲置之死會上意解
謫雲南定遠典史嵩敗起為建寧司理累遷至文
選郎中時臺省員缺秉彝議取五十三人皆極一
時之選遷貳太常改大理尋長太僕平恕精敏所
至底績後尹順天淮
事五日卒賜祭葬

高儀

萬厯杭州府志字子象錢塘人嘉靖辛丑進士
選庶吉士授編修厯官禮部尚書文淵閣大學

士卒贈太子太保諡文端儀初入火館已卓犖為
人所推時柄臣方以爵祿籠致天下士多方羅之

儀獨抗顏不下坐是久不調及柄臣解政始得進
用莊皇新御凡郊見上帝親耕耤田臨幸辟廱諸
大儀節皆倚辦於儀考據精核種種如禮孝烈后
以保衛功祔世宗廟儀建議孝潔實元后二后不
宜並祔乃遷孝烈於內殿朝廷合祀天地以日月
從至嘉靖間改分祀中官李芳建議請合祀儀執
不可人問其故儀曰即無論分合非是獨奈何使
中官得與朝議時論偉之先是宗藩鄭王弼馮邸
景和皆以建言得罪象莫敢理之儀首倡議請復
封爵上疏諫南苑遊幸及選女採玉取光祿羨銀
等事皆人所不敢言正色立朝不與時俯仰難進
易退天下稱為正人卒之日無問識與不識莫不
惜之

方廉

兩浙名賢錄字雙江新城人嘉靖辛丑進士授
南康府推官徵為禮部主事歷陞右僉都御史

巡撫江南抗疏直陳民間疾苦得減賦百餘萬尋
罷歸穆宗初起南京大理寺卿遷左副都御史總
督漕運請留徐州商稅以佐河工罷如臯屯兵以
蠲坐食歲計減省踰萬絮令為常轉南京工部侍
郎請
老歸

董學

舊浙江通志字愚齋海寧人嘉靖丙辰進士除
行人擢御史大喘强奪民居執法不為屈出按

宣大律將之失機者雖津要弗顧飭武備兼葭邊
學以廣聖化再按畿輔漳泌五河衝決疏請毀隄
置閘以疏上流會通河成漕艘不入衛河奏罷艾
家口六驛遞費大名歲省鉅萬而衛源回隆諸隄
河南者亦賴以甦息又請減征徭均里甲清驛傳
理徭狂皆務大體比沒無以為殮世稱廉御史
孫枝
杭州府志字敬身錢塘人嘉靖己未進士授太
常博士改戶科給事中內艱起復取道江淮述

耳目所睹聞奏救災荒理河患二疏又奏內使擾害光祿積弊辭甚剴切穆宗立遷刑科左給事時沈鍊冤既白詔逮楊順路楷抵辟而守巡二道王用中郭天俸相助為羅織者冀倖免請於枝技斷其罪曰順楷為嵩父子効命此兩人又効命於順楷法分首從當誅朝野稱快勅遣中使三人董營事技以宦寺典兵弊將百出力數其不可帝不悅詰大學士徐階對如枝言乃召三人還已復論大學士高拱專擅狀拱罷去進工科都給事外補山西叅政分守冀寧落職歸

許子良

舊浙江通志字直夫仁和人隆慶戊辰進士授閩縣知縣擢監察御史巡河東鹽所綜三

省吏甚悉按河南歲稔以便宜發各倉賑濟比命下而道饑已蘇時政專尚鷹擊而子良以寬大待之張居正密屬子良糾巡撫子良不應移疾歸居正卒以薦起入臺尋擢貴州巡撫又改鎮鄖陽未

赴卒

沈楠

舊浙江通志字汝林仁和人隆慶戊辰進士授南昌府推官花園鄉故稱盜數楠單騎詣賊皆

面縛悔罪楠白於上官盡解縱之事聞賜金綺以卓異召為監察御史江陵當國楠疏劾其黨殷正茂冒功不法又彈其持政操切非所以輔少主居正銜之出巡按陝西以疾卒

金學曾

兩浙名賢錄字子魯錢塘人隆慶戊辰進士授工部主事歷郎中改禮部出督楚學時張

居正所飭學政首禁講學學曾不以為然曰學不講則所崇何業無何奪情事起學曾曰是可令楚士見乎為十揭以上語甚切至未幾楚直指朱璉希居正意疏劾鐫級歸居正歿起僉事歷右僉都御史撫閩倭寇繹騷學曾策其出沒多在澎湖乃建關置戍以遏其衝倭至令急擊不使得聚觜蓄

力乘風窺犯屢有松汀烏坵浯嶼銅山澎湖南澳
甘山之捷顧失直指意以濫餉劾事尋白連疏乞
歸

許聞造

兩浙名賢錄字長孺海寧人黃門相卿仲子
舉萬厯鄉試選河間府推官有能名內艱服

闕補東昌拜貴州道御史建議風發摘大司馬石
星忌諱不顧又條上兵餉七事出按甘肅聞礦使
四出兩疏極諫又疏劾張侍郎養蒙又言主事洪
其道歸名頌德依附呂坤之門牆不顧名義凡數
千百言疏入
忤旨落職歸

陳禹謨

分省人物考字孟文號心抑仁和人萬厯丁
丑進士授中書擢監察御史巡鹽兩淮巡按

江西所至以簡肅稱還京給事中孟養浩以爭國
本扶闕下禹謨疏力諫將并扶閣臣具揭救得免

請養里居十年起補巡漕陞太僕卿巡撫
鄖陽轉刑部侍郎卒於官贈刑部尚書

鍾化民

兩浙名賢錄字維新仁和人萬厯庚辰進士
厯宰惠安舉清廉第一移劇樂平治狀視惠

安以廉能卓異拜山西道御史為忌者所中改行
人遷禮部主客司員外會三王並建之議起乃移
書責政府尋露章劾之終寢其議改儀制郎中瀋
藩請封其庶子為王已許之化民持祖制不可帝
諭曰第與虛名令得藉以婚娶化民奏曰惟名與
器不可以假且陛下視瀋藩與元子孰親瀋藩不
即封慮妨婚娶元子不即立不妨豫教乎帝始震
怒後旋悟遂罷尋改光祿丞河南大飢廷推化民
往賑命兼河南道御史假便宜行事倍道入境晝
夜籌畫所全活不可數計乃倣鄭俠流民圖作救
荒圖說以報得旨褒嘉轉太常少卿以右僉都御
史出撫河南時中使銜命開採為奸利化民上疏

力爭不報諸礦盜乘釁羣起宛洛間又河賊擁衆阻險肆掠官兵弗能制化民親督將吏設方畧擒斬亂首餘皆解散境內以平疾作卒中州士民請祠特賜祠額忠惠贈右副都御史

祝以

舊浙江通志字耳劉海寧人萬厯丙戌進士知隨州入為兵部員外時關白攻朝鮮大司

馬石星主招撫以幽曰日本勅賊朝鮮屬國今以朝鮮急而遣招撫是棄朝鮮也東藩已折於日本勢必及我朝議是之已無憲粵東清刷韶廠商料儲為軍需稅喘不敢撓其柄報最以終養居鄉十六年起江西按察使請罷建武橋稅商民永利尋擢應天府尹晉工部左侍郎致仕

沈朝煥

獻徵錄字伯舍栢之子萬厯壬辰進士授工部主事時倭事孔亟上疏以相機速襲對馬

近襲釜山為上策議和通市為下策而終之以練土著墾屯田重武科用反間疏入不報尋命權關

荆南苛細悉指民困大蘇轉職方員外陞武選郎中謝絕權貴鉗勒豪吏積弊肅清會有錦衣陳某以威嚇陳乞欲併軍功索黃金為壽朝煥揮去堅持不可忽傳中旨陳某准陞三級與世爵時夜半中官督促取覆朝煥具疏叅劾事遂寢諸不便之者中以考功法調外知靖州歷陞四川按察僉事福建布政司叅議致仕歸

楊廷筠

抗州府志字作堅仁和人萬歷乙未進士授安福知縣擢御史巡太倉會中旨取太倉庫

金三十五萬廷筠奏曰祖宗積貯至今尚存八百餘萬陛下御極以來支用七百餘萬今一旦又支若干脫有急需何以應之時礦稅之使出廷筠數以疏諫盡發陳奉馬堂陳增等姦狀出按江西以三吳民重困摧稅上減摧疏遷按察副使請告歸以薦起河南副使遷順天府丞會魏忠賢用事

遂乞
歸

沈光祚

授舊浙江通志字延甫仁和人萬歷乙未進士

以紅丸事罪輔臣方從哲帝命諸臣集議光祚曰
青宮之挺張差以風癲蔽罪紅丸之藥李可灼以
賚予酬功輔臣即百喙何以自
解人服其明確卒贈工部侍郎

諸允修

進士授襄城知縣入為工部主事督理通惠

河會福王之國道潞河舟例用雙纜民居妨挽道
者議盡撤允修持不可具小舟兩岸俾人夫夾挽
之數萬戶安堵如故三遷雲南左布政使寇迫郊
外民擁門號哭求入議者不聽允修曰此吾赤子
奈何以飽賊刃乎乃由別門先出精兵數十里外
設伏衛之親坐城樓啓門令入所活數十萬天啟

七年以南光祿寺卿致仕

吳太沖

杭州府志字默真錢塘人崇禎辛未進士選庶吉士授檢討與婁東張溥無錫馬世奇清

江楊廷麟保德王邵會稽章正宸相善稱詞林六君子崇禎末年天下已岌岌震動天子方懸重賞厚祿以激厲臣下而下不應太沖以詞臣侃侃直言如理財則清嚴加派弭盜則請重撫綏剪亂則請專勦滅而尤以正人心敦士行破門戶全國體為急辛巳枚卜閣臣召對平臺五人為班以次奏上諸臣所奏皆隨奏隨書太沖獨以國家力疲宜安插飢虛重選循卓為言帝置筆不動顧太沖且前太沖跪奏曰臣之所陳似迂然國家至今日如病羸瘵不特消伐元氣迅利肝膈之劑不可用即驟服參苓效亦不可旦夕期也帝默然量移南國子監司業尋轉右春坊右中允以外艱歸

國朝

黃機

鄉賢留祀冊字次辰錢塘人順治丁亥進士由庶吉士歷禮戶吏三部尚書晉文華殿大學士

端厚清謹公忠體國為戶部稽核釐剔夙弊頓清兩任吏部勵廉節抑奔競疏通壅滯會

諭大臣陳時務機以九門拿獲竊盜給賞太過恐邇者

以邀賞滋波累又審案誣扳良民反覆妄供貽累者衆當照初供定擬毋許任意更易姓名殃及無辜言皆剴切立朝四十餘年廉潔自愛不名一錢

予告歸卒

賜祭葬諡文僖

項景襄

舊浙江通志字去浮號眉山錢塘人順治壬辰進士乙未廷對選庶吉士補檢討歷官兵

部右侍郎儀觀偉然凡國家有大建置輒援據成例以進刑部疏請改五流之例應徙邊者無論遠

近戍烏喇景襄力爭之卒從其議山東濱海民多捕魚為業東撫以民蓬梳行舟者僉欲坐以通海景襄曰山東與江浙不同江浙海寬無礁易泊山東多礁難泊且業經奉

旨奉天直隸山東沿海一帶許民捕捉船容二百石非蓬梳不可行今奸吏舞文以此羅織愚民僅博衣食而乃以重法陷之耶由是皆免且著定例率賜祭葬

楊雍建

公舉事實字自西一字以齋海寧人順治乙未進士知高要縣地當廣右之衝制府駐節

師行絡繹供億甚煩雍建力減浮費重恤夫役有百夫長將軍符下縣語不遜雍建坐而撻之帥以總制府制府曰書生強項廉吏方剛是不可犯乃杖百夫長薦雍建於朝徵授兵科給事中歷刑科掌印因星變上言請清齋修省求直言詢利病并飭内外臣工滌慮洗心共修職業奉

旨嘉

之歷兵部督捕理事左右通政太僕卿以都察院

左副都御史巡撫貴州時湖北川東甫定道次銅

仁烽火迫城下官屬請避去雍正建曰銅仁黔境巡

撫身任封疆去安之因命燔其後山開南門以待

偵者賊疑有伏不敢前既至貴陽疏立營制禁侵

掠捐賦稅省力役安集客戶俾有寧居師還約

束不明者輒上章劾奏軍中號為楊一本始至貴

陽斗米值五千錢教以耕耨比及三年竟成樂土

旋召入為兵部左侍郎以母老乞養歸子中

訥字崙末康熙辛未進士官中允提學江南

徐旭齡

杭州府志字元文號敬菴錢塘人順治乙未

進士授刑部主事改吏部歷員外郎前後居

詔陳言極陳河工夫柳之弊及禁商害汰衙蠹等疏改

銓部八年夙弊一清遷禮部郎中會應

雲南道御史疏十數上視岷兩淮時黃淮並決流

民載道旭齡區畫賑卹全活甚衆歷遷大理少卿

擢僉都御史巡撫山東下車劾罷吏數人嚴禁倉糧河夫之最病民者豪猾望風歛迹陞工部侍郎總督漕務至淮以籌三便釐三害等疏奏請悉見施行卒年五十八

賜祭葬謚清獻兩浙鹽法志旭齡先世居玉山父一鴻徙家錢塘仍授徒故里順治戊子山寇竊發一鴻遇害辛卯旭齡往求父屍走邑之四都長號於途夕暝遇樵人止宿因言曾識一鴻當求之西邨管平山中是夜夢父攜示屍所且曰當問之毛廿八旭齡即戴星往有一嫗見之曰君非徐先生子耶先生被害於魯家倉旭齡行至魯家倉風電大作慟哭絕壑間忽見童子跨牛背而歌旭齡叩之引入茅舍一父老出旭齡曰丈人非毛廿八乎父老驚駭告以故乃指空林間土微掩處恍如夢所見急蓄指血沁之解所衣裹骨歸鄉人奇其事有繪徐子負骨圖者

嚴沆

舊浙江通志字子餐號顯亭錢塘人順治乙未進士授庶吉士改給事中丁酉典試山東故事

聖裔無舉者四氏子不得獨雋沆疏請得歲舉二人著為令康熙初擢吏科掌印給事中請解有司被叅之任杜督撫委卸之端職官之選授不便在籍候憑悉見施行陞太僕少卿晉僉都御史擢副都御史踰年任總督倉場戶部右侍郎軍興孔棘沆通羸絀剔侵蠹進不軋象退不廢公歲省金錢數萬餘乞養母歸卒子曾槃字方貽

康熙甲辰進士官至兵部右侍郎

王益朋

鄉賢留祀冊仁和人順治乙未進士選庶吉士改給事中首疏劾海上鎮將交通賊黨請

按以軍法後果事敗疏凡數十上如清鹽政以足軍需酌漕運以裕國用外復所衛內復五府以保治安修舉盛京以重根本發淮課以定嚴疆糾貪吏以儆官邪皆直言無隱丁酉典試江西轉太僕

寺少卿
卒於官

徐潮

公舉事實字青來一字浩軒錢塘人康熙癸丑進士選庶吉士授檢討遷春坊贊善甲子主江

南鄉試歷諭德庶子少詹事晉通政使陞副都御史尋轉工部右侍郎督理錢局甲戌會試總裁丁母憂服闋即家起刑部右侍郎出為河南巡撫潔已奉公苞苴屏絕凡藩司加平糧道贈耗知府季規悉為削除各州縣止許取耗一分著為令甲除南陽黑鉛之累清衛輝辦漕之弊開溝洫以資兩河灌漑革省城上下供應杜發馬派買暨土棍壟斷市集之禁以安里遞商民其於屬員尤殷殷教誨俾爭自濯磨咸奉法紀閱四載擢戶部尚書充經筵講官兼翰林掌院學士教習庶吉士

聖祖仁

皇帝以高寶居民常被水患皆由洪澤湖漫流宜於高城三壩下築隄束水以入湖又於下湖諸邑

聖祖獨與潮面論形勢指授方畧遂築隄束水以達海事下九卿議及議上

命往董其事至則相地形程器用酌遠近料盈縮分職任役人爭赴功僅百日而工竣

聖祖親臨閱視指顧嘉悅四十七年擢吏部尚書仍兼掌院學士逾年以疾乞休

詔以原官致仕五十二年朝京師恭祝

聖祖仁皇帝六十萬壽疊蒙恩賚與現任一體准廕五十四年卒於家

賜祭葬如禮雍正十一年奉旨建賢良祠於京師

特予入祠致祭復於本籍賜祭

御製祭文以示褒寵

陳詵

公舉事實字叔大號實齋海寧人康熙壬子舉人由中書簡吏科給事中歷刑科掌印擢大理

少卿遷都察院左副都御史巡撫貴州地多山岨不事農桑詵召父老教之耕不二十年墾田數千頃又攜善蠶者即署傍浴蠶治繭遠近效之始知織紵三江苗民弗靖出師討之籌算兵食措置方畧隨機應變不一月渠魁斯得調湖北涖任七日即劾藩司不職去之羣吏震肅時江浙米貴奉

旨命

詵與偏撫商酌遂大弛米禁一時商賈雲集銜艘東下而省城米價騰湧立借藩庫五萬金貴糶賤

賣輪番減值皆以家資墊補江浙米價頓落而楚省亦不受販多米貴之累推使請於白螺磯設關下其議詵條奏不可乃止荆襄水患歲役民不息詵親歷河干兩月工竣水不為灾晉工部尚書轉禮部以老疾引退疏再上允歸六十一年入

觀來京卒於邸第

謝祭葬謚

清恪

沈近思

公舉市實字位山號闇齋錢塘人康熙庚辰進士授臨潁知縣潁與許接壤許有孔家口

水勢衝突為潁患近思出夫十之七助許築堤俄水發安堵無恙又捐建社倉積穀四千餘石建紫陽書院課士復建雙忠祠表葺楊統制墓以昭忠義陞南寧府同知南寧山險多盜近思力行保甲嚴督緝捕期年寧謐尋改清河本裕倉監督洩任一月綱紀利弊整釐悉當奸胥斂迹旗弁暴悍者痛懲之雍正元年陞文選司郎中歷晉吏部右侍郎轉左卯出酉歸庭無私謁當奏

御之

日必越宿齋戒然後敢進惟以至誠篤敬盡職分所當為擢左都御史表率臺端風清紀肅所進奏疏非發議准行之日人莫得而知也卒於官室無餘資

賜帑金一千兩
詔贈禮部尚書太子

少傅誼端恪

嘉興府

唐

陸贄

唐書本傳字敬輿嘉興人十八第進士以書判拔萃補渭南尉德宗立召為翰林學士從狩奉

天機務填總遠近調發奏請報下書詔日數百贄初若不經思速成皆周盡事情衍繹熟復人人可曉是時賊未平帝欲明年遂改元乃議更益大號贄曰今乘輿播越大慙未去陛下宜痛自貶勵不宜益美名以累謙德帝從之始帝播遷府藏委棄至是天下貢奉稍至乃於行在夾廡署瓊林大盈

二庫別藏貢物贄請悉出以賜有功令後納貢必
歸之有司先給軍賞帝悟即撤其署李懷光有異
志李晟密言其變因請移屯帝遣贄見懷光議事
贄還奏懷光必反宜有以制之因勸帝許晟移軍
以勞遷諫議大夫仍為學士還京為中書舍人俄
以喪解官服除以權知兵部侍郎復召為學士天
下屬以為相而竇參素忌之罷學士以兵部侍郎
知貢舉明年參黜乃以中書侍郎同中書門下平
章事舊制吏部選以歲集乾元後天下兵興率三
年一調吏員稽壅案牒叢淆偽冒蒙真吏緣以為
奸至十年不被調缺員或累歲不補贄乃請以內
外員三分之每歲計闕集人檢覈吏奸天下便之
又以西北邊歲調河南江淮兵謂之防秋士不素
練戰數敗將統制不一無以應敵乃上陳其弊帝
愛重其言而不從也班宏判度支卒官贄薦李巽
帝漫許之而自用裴延齡贄上書苦諫帝不憚竟

以太子賓客罷延齡揣帝意薄讒短百緒帝遂發怒貶忠州別駕順宗立召還詔未至卒贈兵部尚書謚曰宣始贄入翰林年尚少以材幸天子常以輩行呼而不名在奉天朝夕進見帝親倚至解衣衣之雖外有宰相主大議而贄輒居中參裁可否時號內相嘗為帝言今盜徧天下宜痛自咎悔以感人心故奉天所下制書雖武人悍卒無不感動流涕後李抱真入朝為帝言陛下在奉天山南時赦令至山東士卒聞者皆感泣思奮臣是時知賊不足平議者謂興元戡難功雖爪牙宣力蓋贄有助焉及輔政所言皆懇到深切或規其太過對曰吾上不負天子下不負所學遑他恤乎既放荒遠常閨戶人不識其而又避諂不著書地苦瘴癘抵為今古集驗方五十篇示鄉人云

宋

婁機

宋史本傳字彥發嘉興人乾道二年進士授鹽官尉調舍山主簿七攝鄰邑率以治績聞遷太

常博士秘書郎時皇太子始就外傳以機兼資善堂小學教授機日陳正言正道又以累朝事親修身治國愛民四事手書以獻隨事開明多所裨益擢監察御史韓侂冑議開邊機極口沮之謂恢復之名非不美今士卒驕逸財力未裕萬一兵連禍結久而不解奈何侂冑不悅遷右正言進太常少卿兼權中書舍人詔遣宣諭荆襄機昌言曰使往慰安人情則可必欲開邊啟釁有死而已不能從也泗州捷聞愈增憂危且曰若自此成功以撫列聖之宿憤老臣雖死亦幸但恐進銳退速禍愈深耳遂以言去侂冑誅召為吏部侍郎兼太子左庶子還朝言權臣以私意橫生敗國殄民今當行以至公又言兩淮招集敢勇若非繩以紀律課其勤惰必為後害遣禮部尚書擢同知樞密院事進叅

知政事當干戈甫定信使往來之始瘡痍方深敵
蠹紛然機彌縫裨贊甚多尤惜名器守法度進退
人物直言可否不市私恩不避嫌怨數上章告老
以資政殿學士提舉洞霄宮卒贈金紫光祿大夫
加贈特進

衛涇

萬厯嘉興府志字清叔其先齊人唐末避亂居
秀州孝宗親擢進士第一厯起居舍人假工部

尚書使金還除直煥章閣知慶元府開禧初召拜
吏部尚書御史中丞請誅韓侂胄論罷右相陳自
強拜叅知政事又患史彌遠欲去之彌遠乃諷御
史劾罷涇知揚州除資政殿學士致仕卒贈太師
追封秦國公諡文節初侂胄嘗指朱熹偽學侂胄
誅請召熹還朝已卒涇乃取諸經四書傳註刊布
之所著文章奏議
五十卷曰後樂集

常楙

宋史本傳字長孺淳祐七年進士調常熟尉公廉自持不畏彊禦部使者交薦之調婺州推官

疏決滯訟以刺繁裁劇稱拜監察御史知無不言尋為兩浙轉運使禁戢吏姦不以急符督常賦海鹽歲為鹽潮害稼楙請捐金發粟復輟已帑修築新塘三十六百二十五丈名曰海晏塘邑人德之遷戶部侍郎兼刑部勾祠不許以集英殿修撰知平江節浮費修府庫既代有送還事例自給吏卒外餘金萬楮楙悉不受吏驚曰人言常侍郎不愛錢果然改浙東安撫使值水災捐萬楮以賑之復請糴於朝得米萬石蠲新苗三萬八千又以諸暨被水尤甚給二萬楮付縣折運民食不至乏絕尋以刑部侍郎召平反甚衆兼給事中封還隆國夫人從子黃進觀察使錄黃買似道以御書令委曲書行楙迄不奉命以寶章閣待制提舉太平興國宮德祐元年拜吏部尚書進叅知政事卒

謹按至元嘉禾志楸先世本臨邛人
自其曾祖同徙居海鹽遂為海鹽人

明

俞山

獻徵錄字積之秀水人永樂癸卯舉人選崑山訓導正統間擢鴻臚寺丞陞少卿尋拜吏部左

侍郎凡所薦擢不求人知有請謁者輒正色拒之
景泰初議迎復之禮同列頗有難者山獨奮曰鑒
輿復然後人心悅而天下安況天倫所繫
之至重耶極力贊之事乃克濟尋以疾歸

呂原

呂憲

湯斌呂原傳字逢原秀水人正統七年進士授翰林院編修景泰初進侍講天

順元年改通政司左叅議仍兼侍講入內閣尋進
翰林學士原性厚重儀狀端偉石亨等用事貴倨
顧獨敬原原朝會衣青袍亨笑曰行為先生易緋
原不答無何岳正與原列上曹石罪狀疏留中曹

石覺大恐先是承天門災正草罪已詔至是摘其語謂謗訕正遂罷去原得留與李賢同直內閣賢通達遇事立斷原守正恪誠濟以持重遭母喪歸卒贈禮部左侍郎諡文懿子憲字秉之以父廢補國子生遷中書舍人憲宗七年中順天鄉試試禮部不第仍為中書舍人累遷禮部主客司郎中典屬國事諳習掌故琉球請歲一入貢意取賈市得便利憲以非制格之回回貢使乞道廣東歸國憲曰西夷貢有常道更之起他釁遂寢其奏以薦進南京太僕寺少卿故事太僕馬數禁人不得問卷簿多磨滅登耗無考憲曰他官不與聞是也太僕職此而可買貿耶議請馬政卷簿太僕官三年一照著為令遷太常寺卿採集累朝祀典沿革為條例上本寺利便十二事俱見施行劉瑾用事再疏乞罷歸

項忠

吾學編字蓋臣嘉興人正統七年進士授兵部主事歷陞陝西按察使會陝饑不待奏報輒發

倉賑給全活萬人後為大理卿既行陝人詣闕乞留改右副都御史巡撫其地成化四年固原土番滿四叛有衆二萬據石城遠近戒嚴詔忠總督軍務同馬文升劉玉進討忠移兵據賊水草前後大小二百餘戰賊愛將楊虎貍被擒乞自效忠即遣去四竟為虎貍所誘擒因陳四事為經久計召還會荆襄大旱流民入山倡為亂忠出總督軍務遣人持榜入山諭降其負險不服者縱兵剿之凡遣還鄉者四十萬人編戍者萬餘人俘斬二千人上便宜十事尋進左都御史召為兵部尚書錦衣百戶韋瑛挾汪直為詞察屢興大獄中外重足莫敢言忠草疏發直瑛奸罪疏入罷瑛坐戍邊未幾直又得領厥遂首誣忠下廷訊落職久之諸奸次第敗復忠兵部尚書致仕卒贈太子太保諡襄毅

張寧

名山藏字靖之海鹽人景泰進士授禮部尚書中憲宗元年太皇后生日帝為設醮禮部尚書

姚夔歛會大臣燒香行禮寧疏言諸大臣但能和衷助德則自可上綏懿祉而夔等乃斂財辦香約期赴壇無益事情徒傷國體乞勅禮部禁止帝善之南京給事中王徽等劾李賢獲罪謫邊寧合六科中救賢不悅出寧知汀州興學崇賢痛裁頑梗治稱神明踰年乞歸父老遮留有泣下者列朝詩集傳寧奉使朝鮮陪臣朴元亨為館伴從遊太平館賦百韻詩朴和之殊不相下寧得溪流殘白春前雪柳折新黃夜半風之句朴乃閣筆曰不能屬和矣

劉泰

弘治嘉興府志字世亨海鹽人由進士入翰林為庶吉士拜監察御史嘗按遼東及南畿諸郡

辨獄有聲天順初石亨專權用事人莫敢言泰與御史楊瑄彈劾之風節凜然

馬璇

嘉禾徵獻錄字季明平湖人天順甲申進士由行人擢御史疏請早建儲謹灾異飭武備防水

旱帝嘉納之巡視京畿行部所至以清直聞

潘蕃

楊李往哲初編字廷芳崇德人成化二年進士授刑部主事歷員外郎中沁源王與州官互訐

持不解朝令下蕃泄事蕃廉知左右撥置王狀因列其罪置之死雲南鎮守太監錢能攫金蠻部危動邊鄙由指揮盧安輩釀釁蕃往正盧安輩以法歸請併治錢能士論壯之已而出守安慶改鄖陽鄖陽初創界接陝洛流民歸者如市蕃因撫以土著遂稱善郡歷晉右副都御史撫四川申飭軍政倖功生事者悉治之常單車行視松茂夷人莫敢輕出陟右都御史總督兩廣節制特嚴一號令出即大將不敢喘息方面而下稍違約束必召軍正治以法不少貸黎寇符南蛇等衆號數萬蕃親統

兵逆擊大破之蠻氛以息思恩知府岑濬叛蕃籌其所居道里遠近分六哨以進濬遂伏誅豐湖十三村徭寇及惠州古三仔唐大鬚等阻兵肆亂蕃督率部兵掩擊殲其渠魁餘黨灰滅在廣五年屢大戰伐前後斬賊無算正德改元召拜南刑部尚書時逆瑾稔橫蕃堅求去命乘驛歸年七十九卒

嘉靖年
賜祭葬

屠勲

獻徵錄字元勲平湖人成化己丑進士授工部主事改刑部歷員外郎中皆劇曹剖決無滯京

城無籍子季勝誘其主之子福為私鑄而陰令詞事者發其事福坐戍邊衆知其冤莫敢問勲曰此奴利主之產也為直其事以福罪罪勝而歸其產進大理少卿擢右副都御史巡撫順天寶坻產銀魚中使歲取供薦因之橫索民不能堪麻峪山有銀礦守臣以中旨索之勲皆疏言其不可詔戒約

中使而礦事卒不行遷刑部右侍郎尋進左會咸
晚與河間民爭田構訟勲奉旨覈勘上言食祿之
家不言利況母后誕毓之鄉而與小民爭寸地臣
以為不可孝宗嘉納歸其田於民正德丁卯拜尚
書時逆瑾用事諸司諷先關白而後奏聞勲曰若
是是無朝廷矣瑾銜之勲引疾求去以太子太保
致仕卒

謚康僖

陸

淞

士羅欽順陸淞墓碑字文東平湖人弘治庚戌進

私淞執不可瑾怒遂中以事下之獄淞怡然不以
為悔竟亦無他陞主客郎中日本使者宋素卿本
華人賄瑾求數入貢以便其私淞立言非中國之
利因請執素卿以正國法事遂寢陞南京鴻臚寺
卿武宗親征逆藩駐蹕南都一切禮儀禮部皆與
參酌而行無弗允嘉靖改元淞陳言十事上嘉納

之陞南京光祿寺卿諸務多涉中官羣小惡之奸
蠹百出淞悉懲以法勞費大省再疏乞休歸卒賜
葬祭

陸杰

兩浙名賢錄字元望淞之子弘治進士授兵部
主事轉員外郎中出叅議湖廣歷遷廣東左布

政五嶺以南擅番舶之利杰懲犯禁者數十人民
始斂輯安南貢使不至朝議以都御史毛伯溫督
師征討杰預偵安南隱事為伯溫言可不煩兵而
服伯溫以聞許便宜罷兵未幾莫登庸果上表請
罪補貢擢右副都御史巡撫湖廣時大駕幸楚供
億浩繁杰處分若素定進工部右侍郎卒於官贈
工部尚書杰負氣剛直侃侃不阿自為郎時武宗
南巡杰與黃鞏陸震伏闕極諫廷杖四十幾絕而
甦由是直聲震天下入仕四十年歷
五省十三任皆積勞序遷所至有聲

曹瓊

天啟平湖縣志字玉夫弘治癸丑進士授御史侃侃持風裁有戚畹投千金乞寘讎家於辟瓊

正色曰人命至重吾不受此辜金也為御史數年論列百許多中機宜劉大夏嘗曰諫垣中如曹瓊

他日堪大用無何卒

屠堯

萬厯嘉興府志字文治平湖人以進士授常州府推官決獄明敏擢御史武宗南巡上疏請回

鑾復疏止興作重經筵崇聖學寬重罰皆國家大體巡廣右時歲飢堯設法糴運且增價招商多所全活補山東副使致政歸兄奎亦為御史巡視江石累疏宸濠不軌有直聲官終叅議

趙漢

兩浙名賢錄字鴻達平湖人正德辛未進士授建昌府推官召拜給事中繩愆弼違有抗直不

撓之節凡厯三科前後奏疏不一上武宗者三世宗者十有四責四話者二奉詔逮獄受杖者一其

間若論蕭敬之怙終崔丈之擅政谷大用之請乞鑿鑿中寔至論首輔張孚敬專職自恣尤人所難以是出為山西叅政不數月乞歸

包節

萬厯嘉興府志字元達嘉興人成進士筮仕東昌司理多所平反召拜御史按閩滇皆以直著

繼按湖廣時巨璫廖斌以鎮守威毒三楚節廉其不法事抗疏劾之忤旨逮獄幾斃杖下謫戍莊浪疾卒隆慶改元贈光祿少卿

鄭曉

海鹽文獻志字室甫嘉靖癸未進士授職方主事日取故牘閱之由是盡知天下阨塞與其士

馬虛實強弱之數甲中以議大禮杖闕下許讚為太宰調曉考功轉郎中夏言罷相有詔考察臺諫嚴嵩意在去其異己者曉更斥其所厚者若干人嵩子世蕃以治中求為尚寶丞曉謂非故事不聽

嵩益怒密疏曉抗上市恩貶和州判官曉至和日
夜治民事訪諸所欲惡次第罷行之遷南考功郎
中歷刑部右侍郎改兵部兼僉都御史出撫鳳陽
會倭入寇江南北運道為梗曉至鎮勵將士選民
兵集鹽場壯勇禦之於通泰襲之於如皋擊之於
海門搗之於呂泗圍之於狼山斬首九百餘級賊
遁去東南之賦歸輸京師無後期者又築三里閘
以通漕渠開湖櫃以興水利淮以南無水患遷吏
部左侍郎尋遷右都御史協理戎政奏罷諸軍之
役於工作者象咸感奮改刑部尚書奏論錦衣所
治獄多失實而五城御史受民詞非舊制又謂王
直於法必當誅留都亂卒漸不可長劾嚴嵩之張
紳董傳策吳時成不可罪諫立儲之郭希賢不可
殺咸與嵩議不合乃落職還病卒穆宗改元贈太
子少保

謚端簡

陸邳

萬厯嘉興府志字秀卿嘉善人嘉靖丙戌進士初任南刑曹嚴嵩屢謁之邳拒不見嚴托人私

詢其意邳曰此人雖赫赫有時名實奸雄也嚴銜之厯任兵部武庫郎出知武昌徙岳州在任崇節儉寬逋賦省訟獄開荒田歲飢竭倉庫設法賑貸活飢民數百萬時嚴嵩柄政銜前事十年不調御史伊敏生巡厯至府邳供奉甚薄伊直入其衙惟老蒼頭二人敝筐無鎖檢之殘書百帙布衣數事而已特疏薦陞京堂邳至都不謁嚴嵩嵩遣人諷諭之邳曰受職天朝拜恩私第賢者猶不為況未受官而先謁權貴乎卒不往陞太僕少卿轉南光祿尋以僉都御史巡撫河南乞歸卒

錢薇

海鹽縣圖經字懋垣海鹽人嘉靖壬辰進士授行人選禮科給事夏言以議郊祀與霍韜相訐

奏薇疏論其傷國體手批嘉獎繼又論閣臣戚里內侍章十數上並劄直無諱避尋有勅清查倉儲

薇得楚及粵西虛心搜覈摘發乾沒萬計歸晉本科右是時夏言已入相嚴嵩為禮部尚書上齋宮祈年尊信方士陶仲文又翊國公郭勛恃寵侵朝柄至請復內臣鎮守擅署宿衛官不關白本兵薇發憤一疏糾勛再疏糾言三疏乞罪方士語皆中帝所忌削職歸卒隆慶改元贈太常少卿

孫植

萬歷嘉興府志字斯立平湖人嘉靖乙未進士選南北部中官潘珍從子怙勢為奸利植正其

罪厯光祿少卿時嚴嵩柄政植守正不阿以故九年不調祠官祝釐取辦光祿費多不經植為簿正歲省大官數十萬巨璫耿清以鐵人稱之尋擢南掌院拜大司寇訊巨閹王采邢保張進朝獄盡法不少貸致仕歸卒謚簡肅

陸光祖

獻徵錄字與繩別號五臺平湖人嘉靖丁未進士授濬縣令大司馬趙錦檄役三輔民為

邊夫築垣牆光祖具言不便狀已復言於直指謂
必欲役內地民莫若令出錢與邊民如雇役法直
指上其議竟得請人心乃安內鄉王奪民田封邱
王遣蒼頭私販鹽暴橫道路光祖一裁以法無少
貸邑人盧柝嘗忤邑令遂假事坐重辟歷數令不
白光祖得其冤狀言於當道釋之自是平反之聲
聞於遠近凡四郡有疑獄必以屬之無不得其平
者徵補南禮部祠祭主事轉儀制司佐大宗伯嚴
訥正伊王典樸罪發太醫院吏目何雲龍等乾沒
狀痛革諸王府襲封請婚諸濫費其他如方技并
近倖貴戚非分陳乞並寢不行訥改太宰遷光祖
為驗封郎歷考功丈選典選數月所注措皆翕然
稱當而御史孫丕揚以專擅論之竟削籍家居六
年起南太僕少卿歷晉南大理卿時張居正秉政
專恣臺諫諸曹郎先後糾論相繼削籍論遣不少
貸先祖貽書規諷語甚切至居正故與光祖同籍

又以其夙望欲引以相助而光祖每與語輒不合
遂力求去居正歿起為南兵部侍郎遷工部尚書
改南吏部內監張鯨招權恃寵光祖疏陳鯨奸惡
狀擬置重典又言建國本以安社稷疏皆留中不
報遂以疾乞休不聽未幾召為刑部尚書改吏部
在事杜餽遺禁私謁壬辰大計畢事簡廉吏二十
二人以風吏治拔幽振淹不遺餘力閣臣申時行
嘗揭薦張位趙志臯自代光祖上疏謂非先朝舊
規嗣今擬復廷推以重政本詔從之已而廷臣會
推循例及光祖巨璫田義素憾光祖遂借此為蜚
語交關上前光祖義不可留力
請歸卒贈太子太保謚莊簡

陸光祚

萬厯嘉興府志字與培平湖人嘉靖己未進
士授兵部主事補禮部郎隆慶間三疏請皇

太子出閣講讀慮宗祿不支疏請限服制開生業
謚法卹典過濫奏為條例肅懷王無後堂叔越序

乞嗣固爭不與出為湖廣副使移提學陝西以疾卒官

鄭履淳

兩浙名賢錄字叔初海鹽人嘉靖壬戌進士選比部郎改尚寶丞時穆宗初立履淳上書

言當今所急莫如用賢願早奮乾剛勿以私昵間正人勿以細娛妨大計凡數千言上怒榜百繫廷尉獄逾年得釋為民神宗即位復起尚寶丞遷光祿寺少卿卒

沈思孝

獻徵錄字純父號繼山嘉興人隆慶戊辰進士令番禺以卓異授刑部主事疏江陵奪情

事廷杖八十戌神電衛癸未賜環由京兆晉大理卿駁閩郝金獄事郝故司禮張誠嬖人思孝不為動陞右都御史兼兵部右侍郎協理戎政疏減羊紙及止監甲之請省金錢無算又廷爭日本封貢事與當事者左遂乞歸

陸萬垓

嘉禾徵獻錄字天溥號仲鶴平湖人隆慶戊辰進士知福寧州歷刑部員外郎中出知梧

州府開設東安西寧二縣會滇緬大訖遷雲南兵巡副使躬冒矢石下隴川擒岳罕收反卒聲振西
南擢福建按察使進山西左布政調劑貢市得其
平尋以僉都御史巡撫江西去煩苛革餽遺課農
桑躬教化築圩千頃積穀百萬兩賑大荒全活無
算薨運歲輸回青萬垓請以土青代之會丁母憂
卒歸

丁賓

嘉禾徵獻錄字禮原嘉善人隆慶辛未進士知
句容縣清賦額減雜徭建倉濬渠百廢具舉召

拜江西道御史時張居正當國重賓才欲引以為
黨不應會巡按遼東御史劉臺劾居正專擅威福
謫戍復遣賓往勘遼賊賓知其寃投劾歸林居二
十年起南大理寺丞歷進南工部尚書開寶源丈

思二局嚴私鑄之律奸民無敢舞
弊加太子少保致仕卒謚清惠

朱廷益

馮夢禎朱廷益行略字汝虞嘉善人萬厯丁丑進士為漳浦令歲比不登捐俸賑飢全活

甚衆補令嘉定時苦漕兌廷益請於大司農改折
二十萬石歲省民財以五萬計奏最得南儀部遷
考功郎丁亥大計秉鑒精覈公當擢僉事督江西
學政屏絕干謁益王餽古琴受而檄諸學官曰此
琴貯文廟以彰賢王崇儒雅意翌日王以妃弟囑
廷益謝曰校閱時何由私識執法所以敬王也發
卷置劣等擢南通政司叅議時礦稅橫行多所株
逮上疏言奸黨蠱惑未已重地騷動可虞不報
陸長庚獻徵錄字元白平湖人萬厯庚辰進士授廣
智之獄有陰為地者長庚論戍如律改南吏部郎
中累遷湖南按察副使當事者議開礦長庚持不

可事遂寢轉廣西桂平道叅政徭首韋扶中槃花
婆作亂府江震驚屯土兵三萬餘餉往往不給長
庚建議撤之督府有難色長庚曰賊據險百出雖
兵百萬無益奈何令缺餉坐譁乎願勿中制徭易
與耳督府委以便宜進勦於是留兵三千守荔浦
餘盡撤還密與總兵童元鎮定謀襲擒之餘黨皆
讐服聽撫擢湖廣按察使進江西布政宗祿不給
出存積銀十三萬補之值大水請弛長河漁禁賑
卹飢民擢應天府尹進南通政時留都多私鑄官
幣廢格長庚抗疏上聞奸黨撓之疏久不下遂以
疾求去得旨慰留尋
進兵部右侍郎致仕

王慎德

舊浙江通志字遂初嘉善人萬厯進士令萬
安鋤強扶弱政教兼舉擢四川巡按討平楊

應龍亂回朝抗論時事忤旨
罷職光宗即位贈光祿少卿

姚思仁

嘉禾徵獻錄字善長秀水人萬厯癸未進士授行人遷江西道御史出按河南先是世宗

時薊州人李昇嵩縣人刁騰言開礦之利乃分遣中璫崔閔等相視沿至神宗朝中人四出其害尤甚河南開採議始仲春孫格二人思仁上疏力爭陳八可慮不報乃復繪開礦圖圖著一說以極言其害神宗覽之怒然亦不罪也厯應天府尹遷左通政時聽選儒士蔣定國交結近侍張忠劉遜欲重興礦役於山西其章不由本司徑自投進思仁上疏駁曰礦役停止已久定國乃敢包藏禍心復開亂源乞下法司究問事遂寢熹宗嗣位陞工部尚書加太子太保尋致仕

朱國祚

撫李徃哲續編字養淳秀水人萬厯癸未廷對第一授翰林院修撰厯陞禮部侍郎先後

抗疏請冊立其言剴切會有讒者遂乞歸里居十九年光宗召拜禮部尚書兼東閣大學士未束裝

而熹宗嗣位遣行人敦趣就道時刑部尚書王紀以稽留獄事褫職國祚上疏力救不允嘆曰去一大臣如小吏事不可為矣請告積十有三疏得允卒謚文恪

吳弘濟

舊浙江通志字春陽嘉興人舉進士授蒲圻令拜御史適有三王並封之論弘濟再疏力

諍議旋寢會吳鎮訐趙用賢悔姻弘濟疏理其枉語侵政府帝怒坐以黨護錫兩階尋削籍歸里卒天啟改元贈光祿少卿

岳元聲

舊嘉興府志字之初嘉興人舉進士遷國子博士轉監丞有詔選良家女入宮元聲上言

盛女謁非所以為教又論李長春廢子柰監規一時有鐵監丞之稱已遷工部主事時詔起舊輔王錫爵甫至遂奉三王並封之詔元聲具疏詰責首輔於是得寢晉郎中極論關白稱亂禍始朝鮮大

司馬石星倚沈惟敬封貢之議而輔臣趙志臯墮其術中趙深銜之勒為民里居二十五年天啟改元起南主事歷擢南兵部侍郎署部事逆闖方竊政具疏劾之遂奪官歸崇禎初復原官卒贈南京兵部尚書

沈字先

嘉興縣志字白生萬厯戊戌進士累官水部郎督泉濟上佐開泐河假歸尋起用厯銓部

四司門無私謁庚戌佐察典疏曰一清不足以盡天下之才而一濁足以概天下之不肖真名言也編人才錄凡京朝林下大官長吏皆朱墨劄記每言參苓烏附盡入藥籠驅使乃見國手所著有尚

白齋

詩文

朱大啟

獻徵錄字君興秀水人萬厯庚戌進士授南昌司李舉卓異第一入為吏部主事歷考功

大選郎中時魏忠賢用事謀遣內臣分鎮九邊家
宰王永光等公疏廷爭大啟實具草大忤璫意遂
引歸崇禎改元闡以次正法擢太常少卿已而以
添註太僕卿督餉江右有旨額外搜括大啟言江
右貧瘠正額不充安問額外乃得罷厯陞刑部左
右侍郎尋署部事三遇熱審皆極力平反所全活
無算以病告歸卒贈刑部
尚書子茂時貴陽知府

錢士升

嘉禾徵獻錄字抑之嘉善人萬厯丙辰殿試
第一授翰林修撰天啟初乞假歸進左中允

不赴魏大中趙南星被難並為營護同年生萬燝
扶死恤其家以是有名崇禎元年起少詹事厯禮
部尚書兼東閣大學士上疏獻寬簡虛平四箴上
優旨報聞武生李璉請括江南富戶充餉士升惡
之擬旨下刑部提問上不許發改擬溫體仁遂輕
擬以進士升曰此亂本也當以去就爭乃疏言周

禮荒政十二保富居一今以兵荒故罪富家股削
議括其財而籍沒之此秦皇不行於寡清漢武不
行於卜式者而欲行於聖明之世乎疏入
降嚴旨切責士升引罪乞休後七年卒

國朝

杜臻

鄉賢留祀冊字肇余秀水人順治戊戌進士入
翰林累陞內閣學士禮部侍郎轉吏部左侍郎

歷工刑兵禮四部尚書其佐吏部時耿尚二逆既
平餘黨竄匿者悉降內地無所容閩粵督撫議以
海畔棄地處之

特命

臻往視形勢詳議安插防守臻至宣播德意諮諏

民隱徧歷沿海地土區置有方在刑部舊制獄囚
每月給米粟煤炭而獄吏與禁卒朋比乾沒囚多
庾死臻廉知其弊重懲之戒諸吏有更犯者罰無
赦囚皆感泣轉兵部時以兵冗耗餉議裁汰臻以

裁之則兵無所歸請自後各標兵有缺伍者勿補數年後額自減矣從之尋轉禮部尚書致仕歸

御書煙霞耆舊扁額以榮其行卒
賜祭葬

吳涵

嘉興府志字容大石門人康熙壬戌進士授編修歷副都御史疏請禁止湖南加派安插四川

流民陞工部侍郎理實源泉局時以鑄錢故采買廢銅銅商趨利吏得為奸涵設籤聽商自掣商人稱便轉刑部審察蒲臺命案粵東提鎮失機皆稱旨進吏部侍郎兼翰林院掌院學士遇銓選一月前預列應選應補姓名次序揭於通衢吏不得上下其手又念舉人揀選或至終身不得一官疏請單月兼選著為令尋陞左都御史仍兼掌院以病歸卒
賜祭葬

浙江通志卷一百五十八